

BUFWĪKÍGWE ²

☛ Une . . . ngābile panandi itolo. Une nāli nagwe yumo ungāsi, ungāsi fiyo, kangi une nafimbilisigwaga itolo ukubuka akabalilo kala, 'nongwa yakuti abene bāli fiyo, fiyo babibi. Kangi ukwendesya iligali ukufuma kubutali ku Michigan, unsikali gwa serifu ākōlile, na filifyosa, ukuti abene bāli fiyo, fiyo babibi. Lilino, loli ukwene kukuyaga kanunu mosa; kilikyosa—kilikyosa kili pási pa bulagili, polelo ikyo kili kanunu. Akabalilo kako u Ntwa ikwingilamo, kilikyosa kikuya pási pa bulagili kokuti, bule ikylene? O, Umwene—Umwene yo nnunu fiyo; ukwinogona isya bununu Bwake kangi ikisa Kyake, isya iki Umwene ikusanusya kwa uswe, kangi mumo buyilil'ubupala indufyo Syake.

Ena, uswe twāgelile ukwanda, ukuyoba ukuti uswe twābagile ukwega imitu gwakwanda mitatu igya Būku gwa Baefesi. Kangi une ngwinogona uswe twegile amasyu gakwanda matatu, pamo ikyakwanda fitatu i *kindukimo* pala. Uswe tukābūkile patali fiyo mma, loli lumo ikilo iki uswe tubagile ukugela ukukindilila pabutalipo panandi. Lilino, une ngulonda ukuyoba ukuti une ngaya mfunda li Bangeli, kubutali fiyo, kangi kubutali fiyo ukuya mfundakyala, loli une—une nunganile u Ntwa, kangi une niganile ukumbombela Umwene kangi. . . [U nkundwe ikuyoba kwa Nkundwe Branham—Nsimbi.]

Yumo, itolo mu ngozi, atile, itolo bo tukāli ukukindilila lilino, ukalindwana akanini nkipatala mu Louisville, kangi bosa abamang'anyi abanunu ukukinda-bosa bantolígwe umwene, umwene ikufwa lilino, kangi bikusuma u busumilo kuli u mwana uyu. Ukuya baKristi, iyene yo mbombo yitu ukwinamisya imitu gyitu, lilino, ku lwiputo.

Gwe gwalipyana Ntwa gwitu, iyene yo mbombo yitu yene, loli ulwene lo lusako lwitu, kangi ikylene kyo kyitu—kyitu ikinyontwo ukuti uswe tukwinamisya i mitu gyitu i kilo iki bo kipanga, ukuya kibugutila kya bakōleligwa-panja, abandu abitiki apa ikilo iki, ukumanyisya i Lisyu Lyako, pabuyo-na-pabuyo ukutubika uswe nkati mu Mbili, ukuti kūko uswe tubagilile ukuyapo, kangi kūko uswe tubagile ukubomba ukufwanafwana palikimo ukuya mbakasya sya Mbili gwa Kristi.

² Kangi lilino ikylene kikōleligwe pa uswe ukubuka nakalinga kwa Kyala. Kangi aligwesa gwa uswe batāta tukwinogona ukuti, bule linga yula āli gwitu undindwana unnini, mumo indumbula syitu syayaga pakupya nu kubaba nkati mwa uswe, kangi uswe āngali tukōlile ku fipanga ukuti nakalinganakalinga tuyege nu lwiputo. Kangi indumbula ya tāta yumo yikupya, ukubaba.

Ntwa, alisaga u Mundu unkulumba gwa Mbepo Mwikemo itolo lilino ku ndumbula ya t̄ata yula. Sosyamo unsyungulu guligosa ugwa kwilamwa, nu kubaba kulikosa, kangi itikisya umwene amanye ukuti Ugwe gwe Kyala kangi yikayapo nayimo ni mbungo iyi yibagile ukwima mu Kuyapo Kwako akabalilo kako ubutume Bwabunyakyala Bwako bubōmbígwe ni kipanga Kyako na bandu Bako.

³ Kangi bo ukukinda mu ndungu, uswe tukwiputa, ukufuma pa Ndungu ugu gwakindaga une ninogwine pa njila isi pamo injila isi isya lwiputo. Uswe tukaya nafyo fifingi fingi ifya filwilo na mumo ikyene kikubonekela ku kisu, loli akafyata akanini aka kagogi akabalilo akene kakoleligwe mu nyobe sya lwitiko. O Ntwa, inyiputo syitu silitikaga ku k̄aya, ukuti u bufwe kwisilya ubu bukwelela pa mw̄anike yula, kangi bulibongotokaga ubwene; i ngisi, ififunienie, ukusōkapo ba lubafu lwa kitala ikya k̄ana kala, u bonda pamo mwanike, undindwana unnini. Kangi u Lumuli lwa Kuyapo kwa Kyala kulimulikaga pa kene. Akene kalisaga ukufuma ku kipatala kila, mw̄anike alikanunu.

⁴ Kyala, uswe tumenye itolo ukukilania ikisoko abaganigwa bitu bikuḡulila, kangi ikyene kyo kyalwimiko. Loli uswe tubaganile abanini bitu. Kangi uswe tukusuma, Ntwa, ikyo ku lwimiko Lwako, ukuti Ugwe kuponesyaga u bumi bwa mw̄anike yula. Uswe, ukuya kipanga Kyako, tukukemela u bufwe bula, nukuyoba, “Ima kimyemye kwisilya. Ugwe ukabagila ukumwega u mw̄anike yula, panongwa yakuti uswe tukupoka u bumi bwake panongwa ya Kitangalala kya Kyala.” Paga ifindu ifi, Ntwa, ukubuka kulakula ukugolosya ku bung’wale mumo uswe tukulongosya isyene, mu Ngamu ya Yeso Kristi, u Mpoke gwitw. Ameni.

⁵ Ngimba uswe tukwitika? Une ngamanya iki une n̄abagile ukubomba linga une nḡali Nkristi. Une itolo anḡali ndikulonda ukwitugasya kangi mma. Kikayapo nakimo ikyakuyila nu bumi, kwene kukubega abangi kukupokigwa, kyo kinunu ukukinda-fyosa iki une nkimenye.

⁶ Lilino, ikilo iki uswe tukulonda ukwanda itolo ulwalo ulunini ulwa kimanyisyo ikya pabutasi. Kangi une ngugelaga ukubala, panongwa yakuti, untu gosa, linga une mbagile ikilo iki. Polelo pa Ndungu ndubunju une nisakufimbilisigwaga lumo ukugutila mumo fyosa-fibili u Ndungu ndubunju pamo kilo, linga ikyo kili kanunu, ukugela ukuya mbubonekelo ubu ubwa iki une ngulonda i kipanga kik̄ete. O, ikyene kyo kyalwimiko ukwaga ubuyo bwako! Kangi nayumo abagile ukubomba a kandu kalikosa pene p̄apo ugwe umenye iki ugwe kubomba.

⁷ Bule linga ugwe gwayaga ukuya . . . ukuya nu bupanje, kangi pala ālipo u dokotala unnini uyu afumile itolo ku sukulu ukuti umwene āngali . . . akabombamo siku ulupanjo lumolwene

pabutasi. Palema nalinga, umwene āli nnini kangi mmogi, kangi i nywili syake apesile simatigwe, kangi umwene afwele kanunu fiyo, nubwifyusi, na kilikyosa. Kangi umwene ātile, “Une mbyāsīsyē inyibo, kangi une ngemisisyē ifyombo fyosa ni findu.” Loli ugwe gwāli nu tubyebye utunini ukufwana na kila. Une kinunupo nje nu dokotala unkangale uyu ābombilemo ubupanje bula utubalilo twingi pabutasi, bo ngāli une ngitikisya ukuti bāmbūtēge. Une—une ngulonda ukuti mmanye u mundu yumo komma itolo afumile ku sukulu, une ngulonda u mundu yumo nu bwendelemo bumo.

⁸ Kangi ugwabwendelemo unnunu ukukinda-bosa Yula uyu une numenye, ukunkōlela ikilo iki, yo Mbepo Mwikemo. Umwene yo Ndungi unkulumba gwa Kyala kangi u Fundi unkulumba.

⁹ Kangi ukuya kwala-lwalo i Ndumi yangu ikilo iki, pópe ukufuma ku bulumbilili bwa pa Ndungu, ukuti ikyene kyo, abene balīmpīkile Samuēli ni Lisyu lya Ntwa, nukummwitika Sauli, u mwanundumiana gwa Kish, nukumpīka Samuēli, uyu imililaga u Mbepo Mwikemo, panongwa yakuti umwene āyobāga pene pápo u Mbepo āndongosyāga umwene ukuyoba. Kangi akabalilo kako umwene ākōlīle ku bupilikisyo bwabo ku kyene, umwene āyobile, “Kumbukilaga, une ngayobamo nakimo kwa umwe mu Ngamu ya Ntwa loli ki kyene iki u Ntwa akitwele ikyene kukuboneka. Kangi une ngendamo siku nubusitalwiho pankyene pa umwe. Kangi nayumo abagile ukunsosola une panongwa ya butulwanongwa.”

Bo yu Yeso āyobile, “Ywani abagile ukunsosola Une isya butulwanongwa?” Muketile?

¹⁰ Kangi umwene alinkuyoba kangi, ukuti, “Une une ngisamo kwa umwe nukubasuma umwe i hela ni fingi bo fila. Une ngegamo nakimo ukufuma kwa umwe. Loli fyosa ifi une njobile fyayaga ku bununu bwinu, ifi une ndwele kwa umwe ukufuma ku kanwa kwa Ntwa.”

¹¹ Kangi a bandu bosa balinkupa ubuketi, “Ikyo kyo kyabwanaloli. Fyosa ifyo fyo fyabwanaloli, loli pópe uswe tukulonda u mwalafyale. Uswe tukulonda ukuya bo i kisu kyosa.”

¹² Lilino, ikilo iki, i Lisimbo litu likupagulania . . . i Būku lya Baefesi, lyo li Būku lya Yoshua lwa mu Lwitikano Ulupya. Ilyene likupagulania nukubika mbuyo “abaponjoli bala.” Lilino, ulwene lo itolo lwalo ku maminiti manandi, ukwaga ubuyo bo tukāli ukwanda ukubala, ukwandila pa manandi 3. Lilino, uswe tukwaga ikilo kya Ndungu ugu gwakindaga ukuti i . . . Kyala mu Lwitikano Ulukūlu āfingile u lufingo kwa Israeli isya kisu kya butusyo, panongwa yakuti abene bāli babēti na bendanjila. Kangi abene bāli nkisu iki kikāli kyābo mma, kangi Kyala āfingile ukwisila mwa Abraham ukuti umwene ābetile . . .

uluyungu lwake lwisakubetaga ku fyingja ba mia bana nkisu ikya bandu abahesya, nukukubilwa, loli ni kiboko ikyamwaka Umwene isakubatulwaga abene panja ukubuka nkisu ikinunu iki kyonekaga nu lupyu nu lūki.

¹³ Kangi, lilino, bo akabalilo ka lufingo kasegelile kifuki, Kyala alinkufyusya u mundu yumo ukubatwala abene ku kisu kila. Balinga mu kalasi ikilo iki uyu yula yumo āli. . . bamenye uyu yula yumo āli? Mōse. Ketésya, ikyakwegelela ikyanaloliloli fiyo, fiyo ikya gwitu Yula uyu āpegigwe ukututwala uswe ku Kisu ikifingigwe, Kristi. Lilino uswe tulinalo u lufingo, 'nongwa yakuti u lufingo lwitu lo Butusyo bwamwambepo, kūko, ubwabo bwāli butusyo bwamumbili. Kangi polelo abene bīsāga ku kisu iki abene bābagile ukuyoba, “Iki kyo kisu kyitu, uswe tukaya benjanjila kangi mma, uswe twikasisye pási, iki kyo kisu kyitu, kangi apa uswe tulinabo u butusyo. Uswe twisakubyaala ifilombe fyitu, imigunda gyampesa gyitu, kangi uswe tukwisakulya ukufuma ku migunda gyampesa gyitu. Kangi popápo akabalilo kako uswe tukufwaga, uswe twisakubalekelaga abanitu.”

¹⁴ O, mumo uswe tubagile ukubuka nkisu kya ikylene, indagilo sya kilingo, bo yu Naomi na Ruti, Boazi, ukutwala syosa sila kangi, mumo u nkundwe mu Israeli, mumo fikuti umwene ikufimbilisigwa. . . kalikosa aka umwene ātagile kikufimbilisigwa ukutabuligwa ukwisila mu nnyambalankamu. O, mumo kiyilile ubumogi! Ikyene kibagile ukwega i milungu ni milungu ni milungu ni milungu, uswe angāli tukasokamo siku muntu ugu, ukubuka ku kyene. Uswe twābagile ukupinya i Bangeli lyosa nkati pala, mulamula mu ntu gumogwene ugu.

¹⁵ Kangi, o, une itolo nkiganile ukufunda Ilyene. Uswe twālisibile ukulyega Ilyene, kangi ukulyega Ilyene ku kinja kimokyene na sinda, kangi na siku ukusokamo ni Buku limo. Itolo ukwitugasya ni Lyene.

¹⁶ Lilino, loli, ikylene kyāli kindu ikikulumba ukuti ikilingo, mumo ikylene kyāli fikuti i kilingo nkisu fikuti nayumo uyungi loli unnyambala-nkamu gwakifuki ābagile ukutabula i kilingo kila. Lilino, unko une itolo nsopemo akamanyilo kanini apa aka une nāpalamāsisyepo ikilo ikingi, kwa umwe bamāma. Balinga muno bipūtīle abaganigwa binu, abatagigwe? Umma ndaga. Muketile lelo kangi, muketile, “Ikilingo kyako.” Muketile?

¹⁷ Pauli ābabulile abaRoma, ātile, “Itika pa Ntwa Yeso Kristi, kangi ugwe kangi ni nyumba yako mwisakuponesigwaga.” Linga ugwe uli nu lwitiko lwakufwāna kwa gwimwēne ukuya mbopigwe, ulu nu lwitiko ulwakufwana, kisita kupasya mumo asōkīlēpo pa njila bulebule u ndumiana yula, pamo u ndindwana yula, abene bisakupokigwaga mu njila yiliyosa. Kyala, mu njilayimo! Linga Umwene ikifimbilisigwa ukubalambalika abene pa nyuma syabo, balambalele mula nkipatala, bikufwa,

abene bisakupokigwa. Kyala āfingile ikyene. I kilingo! O! “Kangi abene bisakuya ngako kula,” āyobile Yesaya, “na bosa abaluyungu lwabo na bene. Abene batisa kufulala pamo ukonanga mosa mu kyamba Kyangu ikikemo, ikuti u Ntwa.”

¹⁸ O, une ndinako akabuyo kanini une ngusūbĭla une mbagĭle ukufikako ikilo iki, panongwa ya umwe. Ngupya itolo mu ndumbula yangu, ikya ikyo kikugomokela ku kila.

¹⁹ Loli lilino, ukukindilila ku nkyeni. Polelo ngimba umwe mwāketesisye u Mōse, umbomba fiswigisyo unkulumba yula uyu āsulwisye pāsi Israeli pāsi ukikunda i kisu, nukubatwala abene kumwanya kula ku kisu ikifingigwe, loli akābĭkile ikilingo kyabo ku bene? Umwene akābapele abene i kilingo kyabo; umwene abalongosisye abene ukwakufika ku kisu, loli Yoshua āyabenie i kisu ku bandu. Ngimba uko ko kotalusya? Kangi Kristi ākitwēle i Kipanga ku buyo kūko ifyombo fyābo fyātendekelĭgwe ku bene, fyāpegĭgwe ku bene, itolo yu Yorodani ukukilania, loli u Mbepo Mwikemo yo Yuyo Uyu ikubika i Kipanga ndubatiko. U Yoshua gwa mwisyugu ikubika i Kipanga ndubatiko lwake, ukupa kwa yumo aligwesa, ifikungilwa, ubuyo, ubukusi. Kangi Umwene yo Lisyu lya Kyala likuyoba ukwisila mu mundu gwankati uyu Kristi aponisye, u Mbepo Mwikemo. Lilino ngimba umwe mukwegapo fingipo ifya ikyene? Lilino uswe tukwisa kula mwa Būku gwa Baefesi. Lilino, injila yilayila, Umwene yo pabuyo-na-pabuyo ikubika i Kipanga pāpo abene babāgĭlĭle ukuya. Lilino, Yoshua abābĭkaga abene mu kisu ikipeligwe. Lilino u Mbepo Mwikemo ikubika i Kipanga, pabuyo-na-pabuyo, nkisu, iki abene, mu buyo ubu abene babāgĭlĭle ukuyamo, i kilingo kyabo.

²⁰ Lilino, ikindu kyakwanda iki umwene ikwandilapo apa, umwene ikutwala u kalata gwake, “Pauli...” Uyu, uswe twikusyaganiaga pa kabalilo ukuti ifyakubutitu fyosa ifi fyāsetulĭgwe ku mwene, komma ku sukulu ya seminare mma, komma ukuya mfunda-kyala mma, loli ubwene bwāli busetuli Bwamwakyala ubwa Mbepo Mwikemo ubu Kyala ālĭmpēle Pauli. Ukumanya ukuti ifyakubutitu ikya Kyala, umwene āyobile, iki kyāfisigwe ukufuma ku lwalo lwa kisu, lwāsetulĭgwe ku mwene nu Mbepo Mwikemo. Kangi u Mbepo Mwikemo pakati pa bāndu ābĭkāga yumo na yumo ndubātiko, ukubika i Kipanga mbuyo-na-pabuyo.

²¹ Lilino, i kindu kyākwanda iki Pauli ikwandilāpo apa ukubabula a bāndu, ko kwegwa fyosa i... Kumbukilaga, iki kyo ku Kipanga, komma ku gwapanja mma. Ikyene kyo kyambutitu mfipinganio ku mwene, nasiku ukuya gwakupilikisya, kikubuka ukukilania pamwanya pa ntu gwake, umwene ikubombapo nakimo ikyakukindapo ukufwana ni kyene ukukinda nakimo. Loli, ku Kipanga, ikyene lo lūki mu lyalabwe, ikyene kyo lusekelo ulusitakuyobigwa, ikyene kyo lulisimikisyo

ulusayigwa, icyene kyo ngímu ya moyo, icyene kyo lusúbílo lwitu kangí íngímu yitu, icyene kyo Lyalabwe lya Ngulilo, o, icyene kyo kilikyosa iki kinunu. Kabuno kumwanya na pasi fisakumalikaga, loli i Lisyu lya Kyala litisakumalikamo siku.

²² Loli u mundu panja pa Kenani atikumanya nakimo ikya icyene, umwene akáli ikubétabéta. Komma ukuyoba ukuti umwene akaya nnyamba u nnunu, une ndikuyoba ikyo mma. Une ndikuyoba u nnyamba mópe mu Igupto akaya nnyambala nnunu mma, loli umwene. . . mpaka umwene alobwike ku bukabi ubu.

²³ Kangi u bukabi, ubu, u lufingo ulu lwápégígwe ku Kipanga lukaya kisu ikipeligwa mma, loli i kisu kyamwambepo, kabuno uswe twe buputi ubwabunyafyale, i kikolo ikikemo. Polelo mu buputi ubwabunyafyale ubu, i kikolo ikikemo, a bāndu abaswigisye, bakóleligwe panja, bapāgulgígwa, basalígwa, babíkígwa pa lubafu, polelo ikisu kyosa kifwile panja. Kangi uswe tukulongosígwa nu Mbepo. Abanabalumiana na banabalindwana ba Kyala bikulongosígwa na Mbepo gwa Kyala; komma nu mundu, loli nu Mbepo.

²⁴ Fyosa mu lugano, i kindu kyosa kipinyiligwe mosa lilino. Iki kigeligwe ukumanyisígwa utubalilo twingi, kangi kisita kwilamwa iki abafunda-kyala abakulumba bakitikile icyene nubusolofu ukukinda mumi une mbagíle. Loli i kindu iki une ngulonda ukutwala kwa umwe kyo iki: ukuti u mundu uyu ali mwa Kristi, nu Mbepo Mwikemo, abagile ukuya ntengamoyo nu nnyambala akabalilo kako umwene nsobi; ukukubilwa-kutali, mololo, unfindang’oma; umwene yo nnyafu, ugwakwiyufya, unsubiligwa, isusigwe nu Mbepo; siku ukuya gwakubongotola; akabalilo kosa gwakuyenga; umwene yo mundu unkindane.

²⁵ Komma itolo u nnyambala uyu, “Uswe akabalilo kamo twālinakyo icyene. Linga uswe twālalatile, uswe twālinakyo icyene, uswe baMethodisti. O, akabalilo kako uswe twālalatile, uswe twāli nKisu.” Ikyo kyo kinunu, ikyo kyo kyosa kinunu, une ngwitika ikyo nīne.

²⁶ Polelo abaPentekosti bikwisa mulamula bikuyoba ni ndimi, abene, “Twālinakyo icyene; aligwesa āyobile mu ndimi ālinakyo icyene.” Une ngwitika ikyo, nīne. Loli pópe uswe twāsyagenie ukuti bingi bakālinakyo Ikyene tási, umwene muketile. Muketile? Lilino abenye bali. . .

²⁷ Uswe lilino tukwisa ku kyakubutitu ikikulumba iki kikyo kyāfisígwe ukufuma ku lwālo lwa kisu kangi lilino kikusetulígwa mmasiku ga bumalikisyo ku banabalumiana ba Kyala. Umwe mukwitika ikyo ukuya kyabwanaloli, ukuti a banabalumiana ba Kyala bikubonekela pabwelu? Bo uswe tukāli ukubuka kulikosa, unko uswe tusanukile kula ku Baroma untu gwa 8 itolo ku miniti, unko une mbala kwa umwe i kindukimo. Tukéte linga iki kyo iki kikufyukila ku iki une nguyobapo apa.

Lilino uswe tukufikaga ku Baroma 8, ilinandi lya 19 ilya—ilya ntu gwa 8 ugwa Baroma:

Kabuno ikipigwe-nganila kya kigūliligwe... i kipeligwa kikugūlila ku bubonekele-pabwelu bwa banabalumiana ba Kyala.

28 Nu bupigwe-nganila bwa figūliligwe, i kipeligwe kyosa kikugūlila ku bubonekelo-pabwelu. Muketile, u kubonekela-pabwelu! Ngimba ukubonekela-pabwelu kyo fiki? Ukupela ukumanyigwa!

29 I kisu kyosa. Aba kiMuhamadi ukukilania kula, abene bikukilondalonda ikylene. Mosa ukusyungutila, kulikosa, abene bikulondalonda ikylene. “Ngimba bali kugu abandu aba?” Uswe tufumile ukuya... Uswe tufumile ukuya ni nu mbelo ugwamaka ugwakubopa, uswe tufumile ukuya ni filunduma ni njasi, uswe tufumile ukuya na mafuta ni lilopa, uswe tufumile ukuya nu luko losa ulwa findu, loli uswe tutoligwe ukupilika Akalisyu akanini kala akāmyemyemye aka kākwabīle u nsololi uyu alinkuniemba unselekesye ukusyungutila umwene nukusōka panja, alinkuti, “Apa yo une, Ntwa.” Muketile?

30 Lilino ikipeligwa kyosa kikukuluma nu kugūlila ukubonekela pabwelu kwa banabalumiana ba Kyala. Lilino, Pauli ikyakwanda ikuya pakubika i Kipanga katikati kūko Ikyene kibagilile. Lilino itolo ukubwaga u lwalo, unko uswe tubale kangi:

Pauli, untumigwa gwa Yeso Kristi nu bwigane bwa Kyala, ku bikemo (bala bo “abakemisigwe bala”) aba bāli mu Efesi, kangī... abasūbiligwa mwa Kristi Yeso:

31 Lilino, ukuti ili kalasi litisakwibwa ikylene, ngimba tukwisa bulebule mwa Kristi? Ngimba uswe tukwingila i kipanga ukwisa mwa Kristi? Ngimba uswe tukutendeka ubuyobi ukwisa mwa Kristi? Ngimba uswe tukuyubikigwa mmisi ukwisa mwa Kristi? Ngimba uswe tukwisa bulebule mwa Kristi? Bakorinti Bakwanda, untu gwa 12, “Kabuno nu Mbepo yumoywene ntiga,” yumoywene, unywamu M-b-e-p-o, uyu yo Mbepo Mwikemo, “uswe tōsigwe twesa mu Kisu ikifingigwe.”

32 Mu Kisu ikifingigwe iki, kilikyosa kyitu, mu Kisu ikifingigwa iki. Uketile ikylene, Nkundwe Collins? Muketile, kilikyosa mu Kisu ikifingigwe! Akabalilo kako Israeli ālobwike u Yorodani uyu, ukwingila mu kisu ikifingigwe, balinkulwa ubwite pa kindu kilikyosa!

33 Lilino kumbukila, mu Kisu ikifingigwe iki ikyo kitikusanusya ukuti abene bapakikisigwe ku bubine, ikyo kitikusanusya abene bapakikisigwe ku ndamyo. Loli ikylene kikuyoba iki (O! Kitikisya iki kīngīle nubusolofu.), ikylene kikuyoba iki, ikyo kyo kyinu! Sumukaga itolo nu kwega ikylene! Muketile? Akabalilo kako... .

³⁴ Kangi, kumbukilaga, injila yene yiyo Israeli ātagilemo siku unnyambala, ko kabalilo kako ubutulwanongwa bwālingile nkigonelo. Yila yāli yene injila iyi uswe twābagile ukutagamo siku u—u buponjoli, ko kuti ubutulwanongwa ukwingila mu bugonelo, ikindukimo ikisobi pabuyobumo. Akabalilo kako Akani ālibīle ībwe lila kangi umwenda gwa kiBabuloni gula, ubutulwanongwa mu bugonelo, kangi ubwite bulinkubuka mbusobi.

³⁵ Ugwe mbapo une iki—iki i kipanga ikilo iki, ikibugutila kya bandu iki, nubupelelesye, nubupelelesye mu lufingo lwa Kyala, nu Mbepo Mwikemo, bikwenda mwa Mbepo, une ngukanikana ni mbungo yiliyosa pamo ubukubilwe bulibosa, pamo kalikosa aka kaliko, aligwesa Joe Lewis uyu alimo nkisu iki, nu buhuni bwake bosa, na bosa ba basitakwitika aba baliko, ukutwala u bubine bulibosa pamo ubukubilwe nkifigo iki, kangi abene bisakusōkaga apa bali kanunu nubupelelesye. Ena, nkulumba. Kyala āpele u lufingo, bwene ubutulwanongwa ubwa kusitakwitika bubagile ukulubika ulwene kubutali. Lilino uswe tukubukaga ukwisa pási ku iki ubutulwanongwa ubu buli, pa kabalilo. Lilino:

. . . aba bali *mwa Kristi Yeso*:

Ipyana liyege kwa umwe, nu lutēngáno, ukufuma kwa Kyala Tāta gwitu, kangi . . . u Ntwa Yeso Kristi.

Asayigwege u Kyala kangi Tata gwa Ntwa Yeso Kristi gwitu, uyu atu sayile uswe ni sayo syamwambepo syōsa mibuyo igya mmwanya mwa Kristi, mwa—mwa Kristi:

³⁶ Akabalilo kako uswe tuli mwa Kristi, uswe tulinalo u lusaya lwamwambepo. Panja pa Kristi, uswe tulinasyo isyakwipilika. Mwa Kristi uswe tulinalo u lusayo ulwakuyenga. Komma ukutendeka-kwitika, komma ubusyobi, komma ukwifikamoto. Loli akabalilo kosa ugwe kugela ukuyoba ukuti ugwe guli nKisu ikifingigwe, kangi ugwe ukuyamo, imbibi syako sisakukwagania ugwe. Kangi, ikindu kyakwanda umwe mumenye, ugwe kwiyagaga gwimwene nsyobi kangi—kangi mosa, mumo uswe tukukikōlela ikyene nkisu, ummatigwe mosa. Ugwe kwisakusyagania ukuti ugwe ukuya nakyo iki ugwe kuyobelapo. Loli akabalilo kako ugwe guli mwa Kristi Yeso, Umwene āfingile ugwe u lutengani Lwakumwanya, isayo Syakumwanya, u Mbepo Gwakumwanya, kilikyosa kyako. Ugwe guli nKisu ikifingigwe kangi mu bwenenafyo ubwisusye ubwa kilikyosa. Ameni. Bumogi buki! O, unko uswe tufunde:

Ukufwana na mumo umwene atusalile uswe . . .

³⁷ Lilino, apa po apa ifipanga fikwitabania ubibi fiyo.

Ukufwana na mumo umwene atusalile uswe mwa umwene . . . (Mwa Ywani?) Kristi.

38 Uswe tukusyagania lilino, ku nyuma mwa—mwa Bwandilo na mwa Busetuli, Busetuli 17:8, ukuti Umwene átusalíle uswe mwa Kristi bo lukáli ulwalo lwa kisu. Lilino, i lisyu . . . Unko une mbale ilikonge limo:

*. . . u lwalo lwa kisu, ukuti uswe tuyege bikemo kangi
kisita kasolo pankyeni pa mwene. . .*

Ukuya atumányíle-ngānila uswe. . .

39 Lilino une ngulonda ukwima pa lisyu lya “atumányíle-ngānila.” Lilino, *atumányíle-ngānila* ko kukaya kuyoba, “Une ngusalaga u Nkundwe Neville, kangí une—une—une—une—une ndikunsalaga u Nkundwe Beeler.” Ikyo kikaya ikyo mma. Ikyene kyo kumanyíla-ngānila kya Kyalá uyu ámenye ukuti yo ywani ikuyaga nnunu kangí ywani atikuyaga nnunu. Polelo, mu kumanyíla-nganila, Kyalá amenye iki Umwene ayaga pakubomba, Umwene ámanyíle-ngānila ukwisila mu bumanyíla-ngānila Bwake ukutendeka i findu fyosa ukubombela palikimo ku bununu bwa bene aba banganile Kyalá, ukuti Umwene abagíle, mu ngululo iyi yikwisaga, ukukólela i findu fyosa palikimo mwa Yumoywene, uyu yo Kristi Yeso.

40 Unko une negelele ikyakwegelele ikinini apa. Ikyene kinunu. Uswe tukugomokela, une ngusubila une njobilepo pa kyene pakayabo kanini ikilo kingi, pamo ndikile ikyene, mwa Bwandilo, untu gwa 1, 1:26, akabalilo kako Kyalá ákólíle i Ngamu Yake, “Ntwa Kyalá,” ikyene kili mu lisyu lya El, Elah, Elohim, iki kikusanusya, “u njeko-pamwene Yumo.” Kikáliko nakimo ikingi iki kyáliko loli Umwene. Yikáliko i mbepo nayimo, bukáliko u bwelu, sikáliko i ndondwa, kikáliko i kisu, kikáliko nakimo ikingi. Ikyene áli Kyalá, kangí Kyalá mwene, El, Elah, Elohim. Lilino, Umwene átendíke kila.

41 Nkati mwa kila fyálimo ifyakubagilila iki kyanusyaga ukuti Umwene áli yo. . . Nkati mwa yula unkulumba El, Elah, Elohim kyálimo ikyakubagilila pamo i. . . Umwe mumenye ukuti *ikyakubagilila* kyo fiki, pamo unko une njobe bo ulu, kyáli “kayilo.” Uko ko kuti umwinitu unnini abagile ukukupilikisya ikyene, kangí une ne yumo mwa binitu abanini aba bikufimobilisigwa ukukupilikisya ikyene mu njila yila. Nkati mwa Mwene kálimo a kayilo ukuya yo Tāta, loli Umwene yo njeko-pamwene, kikayako nakimo ku Mwene ukuya Tāta. Kangí, lilino, pási nkati mwa kila mwálimo i kindukimo ikingi, ukuti Umwene áli Kyalá; kangí u kyalá kyo kyombo ikya kwiputigwa; loli Umwene áli njeko-mwene, El, Elah, Elah, Elohim, polelo kukáliko nakimo ikyakummwiputa Umwene. Nkati mwa kila, Umwene áli Mpoke, kangí kikáliko nakimo kitagigwe ukuti kipokigwe. Muketile? Nkati mwa kila, Umwene áli Mbumbulusi, muketile, loli kukáliko nakimo kibine ukuti kibumbulusigwe, kikáliko nakimo ukuya kibine. Lilino ngimba

umwe mukupilikisya ikibonekelo? Polelo ifyakubagilila Fyake, akayilo Kake kyätwele iki kili umwisyugu.

⁴² A bandu bamo bikuyoba, “Ena, fiki u Kyala akâkimisye itolo ikyene ku bwandilo?” “Umwene yo ligâsi libibi-ndumbula,” alinkuti Joe Lewis, uyu antobesyaga Joe, pamo Jack Coe, muketile. Alinkuti, “Umwene yo itolo ligâsi libibi-ndumbula. Kikayako ni kindu nakimo bo Kyala. Linga kyâliko i kindu bo iki, Umwene ângali yo. . .” O, une. . . itolo alinkukôlela Umwene u luko losa lwa ngamu, muketile. Loli ikyene kyo itolo panongwa yakuti umwene abagile ukuya nu bumanyi bwinga *muno*, loli umwene akaya nako nakimo pási *muno*.

⁴³ Lilino, uko, uko ko kûko ikyene kilipo. Muketile? I Lisyu ili likuyoba ikyene apa, kangi Umwene akifisile ikyene. Kangi ifyakubutitu ifi fifisigwe lilino, kumbukilaga, ili Bangeli lyâtile, “Ukufuma ku lwalo lwa kisu, ukugûlila ukubonekela-pabwelu kwa banabalumiana ba Kyala,” ukubabonesya abene ku kipanga. O, mwe! Umwe mukupilikisya ikyene?

⁴⁴ Lilino, une nimile pa kapango kangu pa kayabo kanini, pamo une ngutwalaga. . . Une ngubukaga ku linogono lyangu ilikonge ukupilikisya iki. Lilino kumbukilaga, ukukinda mosa mu ngulilo ya Mose, kunyuma ukukinda mu ngulilo syosa, abene bagûlile mpaka amasiku aga agabumalikisyo ukuti i findu fibonesigwe, ukufwana ni Lisimbo. Uko ko kutalusya, ukuti ikyene kisetuligwe ku banabalumiana ba Kyala. Panongwa ya fiki? Ukufuma ku butagigwe. . . mpaka ukufwana ni piramidi, mumo une njobile, ukuyenga kifukiko, kifukiko, kifukiko.

⁴⁵ Mumo une kingikingi ndendikepo ubuyobelo ubu, kangi ndile, Kyala apelile a Mabangeli matatu. Ilya kwanda limo, Umwene âbikile Ilyene mmwanya, u zodiyaki. Ngimba umwe muketilemo u zodiyaki? Ngimba kyo kibonekelo kiki ikyakwanda mu zodiyaki? U mfunde. Ngimba ikyabumalikisyo ikibonekelo kyo kiki mu zodiyaki? Leo i ngalamu. Umwene âlisile akabalilo kakwanda ku mfunde, Umwene ikwisa akabalilo kabubili ukuya Ngalamu ya kikolo kya Yuda. Muketile?

⁴⁶ Umwene âpelile ilikonge limo mu piramidi, ku nyumba mmasiku ga Enoki, akabalilo kako abene bayengaga i piramidi. Kangi abene bikupima agene. Une ndikupilikisya ikyene. Loli ku fibumba, kuko abene bikwinama nukwenda pa mafundo gabo kubutali bumo, kangi babagile ukupima ubutali bwa fibumba. Umwe mumenye kuko abene bikupimila lilino? Ukwakufika ukukilania ikipinda kya mwalafyale. Kangi bo i piramidi iyi yabukaga mmwanya. . . Uswe tukabagila ukuyenda ikyene, na filifyosa ifi uswe tulinafyo umwisyugu. Uswe tukabagile ukuyenga ikyene.

47 Ikyene kiyengigwe mmwanya bo *ulu*, ukubuka pamopene. Kangi ibwe pa... Ibwe-lyakitili likāgigwamo siku. Abene bakābikilemo siku ikitili pa mwanya pa piramidi. Une ngamanya ukuti kali umwe mumenye ikyene pamo mma, i piramidi ilinywamu ilya Igupto, ilyene likālimo siku nībwe lya pamwanya pa ilyene. Panongwa ya fiki? Ibwe-lyakitili lyapīkigwe, Kristi, u Ibwe-pantu, muketile, lyapīkigwe.

48 Loli akabalilo kako uswe tukukula ukufuma ku ngulilo ya kiLuteri, ngulilo ya kiBaptisti, ngulilo ya kiMethodisti, ngulilo ya kiPentekosti, uswe tuli kulakula kumwanya ku Ibwe ilyakitili lilino, muketile, ukugūlila nu kulondalonda ku Ibwe ilyakitili ukwitugasya pasi, inyumba yimālike. Ngimba umwe mukabala mu Lisimbo, “Ibwe lyapīkigwe”? Ena, uswe tukusyagania kila kyāyobaga ku tempeli ya Solomoni. “Loli Ibwe ilipīkigwe lisile ukuya lyo Linyafyale lya nguto.” Kangi une nguyoba iki kwene kukutendeka i—i—i kibonekelo kwa umwe.

49 Lilino, kangi mu i Bangeli, uswe tukwitugasya mu lisiku lyabumalikisyo, pamanya pa piramidi, iswi imbingikano isya ngulilo ya kansa mu zodiaci, nkabalilo ka kwisa kwa Leo i ngalamu, mu ibwe lyakitili, kangi mmasiku ga bubonekelo pabwelu ba banabalumiana ba Kyala, mu i Bangeli, muketile. Mukukéta kūko uswe tuliko? Uswe tuli kulakula ku kabalilo kabumalikisyo.

50 Balinga aba bābalāga ikikalatasi u ndungu ugu, iki Khrushchev na bala bāyobile? O, abene bītendekisye; momumo nuswe tuyilile. Amen. Twitendekisye! Ikyene kili kanunu mosa, muketile. O, lo—lo—lo lusako luki, lyo lisiku liki! Linga abaKristi bābagile itolo ukusyaganoa i lisiku ili uswe tulimo nu bumi! Mwe!

51 Ngimba umwe mukwinogona fiki? U nsimbi gwa Būku uyu, uyu āketile ikyene, nukukéta kūko ikyene kisakubonekelaga pabwelu mmasiku ga bumalikisyo, ukugūlila nu kukolomela ku banabalumiana bala ba Kyala ukufyuka mmasiku ga bumalikisyo, na maka ga Mbepo Mwikemo ku ngulilo ya bumalikisyo, ukusetula i findu fyakubutitu ukufuma ku lwālo lwa kisu, ukukitwala ikyene.

52 Lilino unko uswe tugomokele nukwingila mu “lwālo lwa kisu” kangi, ukwegako u busetuli, ukuti tukéte linga uswe tutalwisye pamo mma. Une ngusubila une ndikwipela nimwene gwāmahelu ukwisila ukunkōlela Kyala, “Papa,” loli une ngulonda ukuyoba ikyene mu njila iyo ukuti umwe mukupilikisya ikyene. Papa! Papa ālondaga a bana bamo, polelo ngimba fiki Umwene ābombīle? Umwene alinkuti, “Unko kuyege a Bandumi.” Kangi Abene balinkwisa ukusyungutula Umwene. O, ikyo kyo kinunu. Abene balinkummwiputa Umwene, pala Umwene āli Kyala, ifyakubagilila. Kumbukilaga, Umwene āli El (E-1), Elah, Elohim, njeko-mwene, nakimo loli

yu Mwene. I kindu kyakwanda kikwisa ukusyungutila bāli Bandumi. Polelo, a Bandumi bakābagile ukubomba ukukinda ukwiputa. Abene bakābagile ukuya batagigwe. Polelo, Abene bakābagile ukuya babine, Abene bāli findu fisitakufwa. Polelo, Umwene alinkutoligwa ukunangisya a maka ga bubumbulusyo Bwake, Umwene alinkutoligwa ukubonesya ubupoki Bwake. Polelo pala, bo kukāli, lilino unko . . .

⁵³ Polelo ukufuma pala, Umwene alinkuti, “Uswe tukupelaga i kindukimo ikyakupalamāsígwa.” Polelo Umwene alinkupela i kisu. Kangi akabalilo kako Umwene āpelile i kisu, Umwene āpelile fyosa i fipeligwa fyā kisu, kangi polelo Umwene alinkumpela u nnyambala. Kilikyosa iki kyafyukaga ukufuma ku kisu, ukwanda itolo ni—ni mbwilibwili pamo iswi-īndependepe, itolo u luko lwa nyama yikwēléla pa misi, ukwanda ukufuma kula, ukubuka . . . ukufuma ku kīla ukubuka ku kyūla, iki kyo luko lwa bumi ulwapāsi ukukinda lōsa ulu uswe tubāgile ukulwaga, abene bikuti, kyo kyūla. U luko ulwāpamwanya ukukinda lōsa yo mūndu. Ukufuma ku kyūla ikylene kilinkwānda ukubuka ku mbulu, ukufuma ku mbulu ukubuka nkyeni kangi nkyeni kangi nkyeni, kangi akabalilo kalikosa u Mbepo Mwikemo andaga ukubomba “whuuushi,” ukutūya, u bumi bwisaga kangi; “whuuushi,” ubumi ubukulumbapo. Kangi i kindu kyakwanda, i kindukimo kilinkutupuka mu kifwani kya Kyala, yula āli yo nnyamba. Nakima kitalile kilimo siku, kikālimo siku, kitisakuya kupeligwamo kangi mma, kalikosa kāpamwanya ukukinda u mundu, panongwa yakuti u nnyambala yo kifwāni kya Kyala. Muketile?

⁵⁴ Polelo u nnyambala, akabalilo kako Umwene āpelile u nnyambala Gakwe u gwakwanda, lilino, akabalilo kako Umwene āpelile a ifindu Fyabundumi Fyake, Umwene āpelile u nnyambala, “Abāpelile Umwene abene gwakinyambala kangi ugwakikikulu,” bosa mu bumobwene bulabula. Umwene āli fyosa nnyambala kangi nkikulu, gwakikikulu kangi gwakinyambala. Akabalilo kako Umwene āpelaga Adamu nukumbika umwene mu mbili, kumbukilaga, mwa Bwandilo 1, Umwene āpelile u nnyambala nu nkikulu, kangi mwa Bwandilo 2, akalipo u mundu tasi ukweselela umfu, unnyambala gwa mbili. Akalipo u nnyambala uyu ābagile ukukōlelela kamo a kandu kangi nukweselela u mfu, loli palema ālipo u nnyambala mu kifwani Kyake. “Kangi Kyala yo . . .” [Ikilundilo kikuyoba, “Mbepo.”—Nsimbi.] Ngimba isyo syabwanaloli. Muketile? Umwene āpelile u nnyambala gwakwanda, “gwakinyambala nu gwakikikulu ābapelile Umwene abene.” Lilino, akabalilo kako Umwene āpelile u nnyambala gwakwanda . . .

⁵⁵ Lilino, kumbukilaga, fyosa palikimo Umwene āli nakyo ikylene mminogono Gake. Kangi ikilo kya Ndungu une nākindilemo ikyo. I—i lisyu lyo linogono ili liyobigwe. Kyala ālinogwine mumo Umwene ikuyilaga Kyala, mumo Umwene

ikwiputiligwaga, mumo Umwene ābagile ukuya Mbumbulusyi, mumo Umwene ābagile ukuya Mpoki; kangī akabalilo kako Umwene āyobile i Lisyu, ikyene kyamalikisigwe kwa bwilanabwila. O, linga abanabalumiana ba Kyala aba lilino babāgile itolo ukukōlelela i Lisyu lila bo lula! Akabalilo kako Kyala ikuyoba i Lisyu, ikyene kimalikisigwe! Kifwasyale! Umwene ābagile ukuti āgūlile. . . Ukubala-kabalilo kukuyoba ikyo, pamo umfunda-fikumbigwa na bosa, abene bikufumusya ukuti lumo i kisu kyāli maelifu-elifu na maelifu-elifu na maelifu-elifu. Une ngamanya, ikyene kyābagile ukuya maelifu-elifu-elifu-elifu-elifu kangī maelifu-elifu-elifu-elifu aga fyinja. Une ngamanya mumo ikyene kyayilile ubutali. Kyala atikuyamo mu kabalilo. Umwene akayanayo i miniti yimoyene ukusyalapo mu kabalilo ukukinda mumo Umwene ābombile akabalilo kako Umwene āyobile ikyene. Umwene akāli yo Kyala. Kakayapo akabalilo nu Mwene.

⁵⁶ Une ngākimenye ikyo bo ulu mpaka ikilo kimo, ulubunju lumo, ndigi. Syepwa, komma mmayolo, komma kilabo, ikyene kyo kyosa lilino. Ngimba umwe muketesisyemo siku i lisyu “UNE YONE”? Komma “Une nāli,” pamo “Une ngwisa kuyaga,” ikyene kyo Syepwa, “UNE YONE,” muketile, “UNE YONE,” bwila.

⁵⁷ Lilino, loli Umwene ālondaga ukubika i findu nkabalilo. Umwene afimobilisigwaga ukupela i kindukimo ukyakwīpūta, ukuti ifyakubagilila Fyake filinkutwala iki. Polelo Umwene āpelile u nnyambala. Polelo, mu nnyambala uyu, umwene alinkubonekaga ali mwene. Polelo, lilino, ukunangisya lilino ilinogona Lyake ilikulumba, iki Umwene āli nakyo mu mbubonekelo ubwa Kristi ni Kipanga, Umwene akālyegile akayabo akakindane aka mfu nukupēla u nkikulu mma, loli Umwene ālyegile ukufuma ku lubafu lwa Adamu, ulubambo; kangī alinkwega ukufuma kwa mbepo gwa Adamu, ugwabukikulu, nukugubika ugwene mu lubambo ulu. Akabalilo kako ugwe kukēta u nnyambala uyu ikubombela bo likikulu, kilipo i kindukimo kitamisyē. Kangī akabalilo kako ugwe kukēta u nkikulu uyu ikubombela bo nnyambala, kilipo kimo kitamisyē. Muketile, kilipo kimo kitamisyē. Isyene syō mbepo ibili ingindane, mosa. Loli, palikimo, abene bikupela ikindu kimo, “ifi fibili fili kimo.” Polelo Umwene āpelile unkikulu nu nnyambala, kangī abene siku bakālimo bakangale mma, siku ukufwa, siku ukuya ni mbuha, siku. Abene bālyaga, abene bānwaga, abene bāgonāga utolo, itolo mumo uswe tukubombela, loli abene bakāmenyēmo siku iki ubutulwanongwa bwāli.

⁵⁸ Lilino une ngukilania papapa apa ku kimanyisyo akabalilo kangī, pa mbeyo ya liyoka. Iyi, abene bandalusisye ukugomokelamo ikyo. Loli unko une nunkete u munduyumo ikwisa nukumbonesya une i kindukimo ikikundane. Ikyo kyo une ngulonda ukumanya, muketile.

⁵⁹ Lilino, loli polelo ukufuma pa fyosa ifi, polelo akabalilo kako ubutwalongwa bwālingile mula, ngimba kikuboneka kyo fiki?

⁶⁰ Kubutali kumwanya ukukilania, pamwanya, i elifu-elifu, amamailosi baelifu-elifu ba mia, buliko ubuyo ubunywama bo *ulu*, kangi kila kyo lugano ulupelesye lwa agapao. Akabalilo kalikosa ugwe kutendeka ilikato injila *iyi*, ikylene kikufyena inchi yimo. Kangi umwe mumenye mumo ikylene kikuyilaga ubunini ukuya kabalilo ikylene ukufika ku kisu. Ikyene kyo nsyūngūlu gwa nsyūngūlu gwa misyūngūlu. Ikyo kyo iki umwe mulinakyo, ikyo kyo iki une ndinakyo, u nsyūngūlu gwa nsyūngūlu gwa misyūngūlu gwa lugano lwa agapao.

⁶¹ Kilipo kimo mwa ugwe, kilipo kimo mwa nkikulu aligwesa muno ukukinda malongo mabili, kilipo kimo mu nnymbala aligwesa muno uyu akindile malongo mabili, iki kikulonda ukusyala. Ugwe ulinafyo itolo i fyinja fihano, uko ko kuti ukufuma pa kalongo-na-fihano ukufika pa malongo-mabili. Ukufuma pa malongo-mabili ugwe kwanda ukufwa. Loli, ukufuma pa kalongo-na-fihano, ugwe itolo uli mwana ntubwa mpaka pala. Kangi polelo ugwe kūkya ukufika mpaka ugwe guli malongo-mabili. Kangi ukukinda pa malongo-mabili, o, ugwe kuyoba, “Une itolo mfwene itolo u nnyambala.” Ugwe kuyoba itolo kila, loli ugwe ukuya. Ugwe kufwa kangi ugwe kupya kubuka, kali ugwe kubomba fiki. Kyala atendike ugwe ugwe ukufika pa ngulilo yila, loli polelo ugwe kubuka kukufwa. Lilino ngimba fiki fikuboneka? Lilino ugwe kwanda ukufwa, loli nkati mula kilipo kimo mwa ugwe iki kikutu, “Une ngulonda ukuya kalongo-na-fihano-na-fitatu kangi.”

⁶² Lilino une ngulonda ukubalalusya umwe i kindukimo. Bule linga ugwe gwāpapigwe ifyinja bamia bahano ifi fikindile, kangi ugwe gwāsyele pa fyinja kalongo-na-fihano-na-fitatu mbukusi mpaka umwisyugu? Linga ugwe ukābagile ukuya kyaiyolo, na minogono gaka aga fyinja bamia bahano ifi fikindilepo! Bo abatāta ababēti bakāli nukwisamo siku kuno, kangi ugwe gwāli nkikulu nkeke nu luko lwa fundo lula. Panongwa ya fiki, ugwe gwāli kanunupo itolo ukukindilila nukuya nkangale nukuya mumi ifyinja bamia bahano. Muketile, kilipo kimo kitamisye.

⁶³ Ugwe kuyoba, “Mulimosa, une ngwipilika kanunukanunu itolo, Nkundwe Branham. O, une ndi—une ndi—une ndi kalongo-na-fihano-na-fitatu, une ndu kalongo-na-fihano-na-kimo, une ngwipilika kanunu.” Lūki, unko une ngubūle ugwe i kindu kimo. Ngimba ugwe umenye bulebule ukuti u nyoko mumi i miniti iyi, linga umwene akaya nkipanga iki? Ngimba ugwe umenye bulebule ukuti unnini undumiana akagogigwa itolo mmaminit manandi aga gakindilepo, pamo unnini undundwana? Ngimba ugwe umenye bulebule ukuti ndubunju ugwe utikuyaga mfimba mu nyumba? Ngimba ugwe umenye bulebule ugwe kusōkaga panja pa kipanga ikilo iki,

mumi? Ikyene kyo kisitakusisimikisigwa fiyo. Kikayapo nakimo ikisisimikisye. Linga ugwe uli kalongo-na-fihano, kalongo-na-fibili, lwele-ukusosyako-fihano, pamo lwela-na-kalongo, kilipo ikyo . . . kilikyosa kikayakisisimikisye. Ugwe utikumanya pápa ugwe gwimile. Loli pópe ugwe kulondalonda ukugomokela ku kalongo-na-gihano, kalongo-na-fihano-na-fitatu. Ngimba iki kikukupela ugwe ukubomba ikyo kyo fiki?

64 Lilino, linga ugwe kugomokela ku kalongo-na-fihano-na-fitatu kangi nukusyala pala, kangi na siku ukuyamo mbine kangi siku ukuyamo . . . ugwe kufimbilisigwa ukuya na bandu abangi na ugwe, panongwa yakuti ugwe kwisakukulaga ukukinda ikylene, muketile. A bandu angali bikubuka mu ngulilo isingi kangi ugwe kuyaga kyaiyolo. Ugwe kuyaga mbubibipo ukukinda mumo ukwene kwāyilaga linga ugwe gwabukaga mbukangale na bene. Loli kilipo ikindukimo iki kikukukōlela ugwe ukuya pala. Ikyo kyo kala akanini aka agapao, akasyūngulu akanini kala aka kakupela ugwe . . . Ikindukimo pamwanya apa.

65 Lilino, ikilo kimo, pamo ulubunju lumo, pa sala ya buhano-na-bubili, akabalilo kako u Mbepo Mwikemo, nu bununu Bwake ni lipyana Lyake, ānyegile une ukufuma mu mbili ugu, une ngwitika, une ngwitika. Ena pamo umma, une ndikuyoba mma, kangi une nālingile m’Kisu kila nukubabona a bandu bala, kangi bosa bāli bakeke. Kangi une nababwene a bandu abamogi ukukinda bosa aba une ngetilemo siku mbumi bwangu. Kangi Umwene alinkuyoba kwa une, “Bamo mwa bene bāli fyinja malongo-lwele-na-kalongo mbukusi. Abene bo bapinduki bāko. Yo nongwa abene bikukalata, ‘Nkundwe gwangu! Nkundwe gwangu!’”

66 Lilino, gula go mbili gwakumwanya, ugu akabalilo kako uswe tukufwa uswe tutikuya kapango, uswe tukuya mbili. Linga uswe, twesa, tukufwa, linga i bomu lya atomiki likupufukaga pa miniti iyi, mu maminiti mahano ukufuma lilino uswe tukuponaniaga ifiboko fya yumo nu nnine nu kubātilana yumo nu nnine, kangi tukałāta nukuhoboka, nukuntufya Kyala! Ena, nkulumba. Kangi Nkundwe na Kalumba Spencer bitugesye apa, une ngusakikisya bamo babili mwa bakangale ukukinda bosa muno, bisakuyaga i fyinja kalongo-na-fihano-na-fitatu, malongo-mabili mbukusi. Nkundwe Neville isakuyaga itolo ndumiana unkeke, kangi une nguyaga itolo akana akakeke. Kangi uswe itolo twesa tukuyaga . . . Ikyo kyo katikati Bwanaloli ubu. “Linga ikitembe kyamfu iki ikyakwitugasyamo kisungulukege, uswe tulinakyo kimo kikugūlila.”

67 Akabalilo kako akāna kanini kakugwa ukufwa kunna gwake, ukuya bupapigwe bwakipeligwa, akambili kake kakukwinienga-nienga kangi amalundi gikunyela-nyela, na fyosa. Nhobokelaga panongwa ya njobelo, umwe bakikulu bakeke. Loli, akabalilo kako akene kakubomba, akene kali

na minyamanyama igyābumi gikusenyenda. Loli akabalilo kako akene kikwisa ku kisu, ikindu kyākwananda, akene kakukōla ubutuyo bwake, kangi gulipo u mbili gwamwambepo ugwa kipeligwa ukuti gwise mwa mwāna yula palapala pala. Kaleka akene pakene, akene kakwegaga akatu kāke akanini nukwikōlekela ku libele lya nna nukwanda ukukōnga. Linga akene kakābombīle ikyo, ulupyu lukabagila nukusoka pāsi.

⁶⁸ Ngimba umwe muketesisye ingwata akabalilo kako iyene yikupāpigwa, iyene...nakalinga itolo linga akene kakabile amaka ukufwana ukuya pa malundi gake? Ywani akukabula akene? Kakwenda itolo ukusyungutila unna, kakwanda ukwikolekesya ukusyungutila nukwanda ukōnga. O, ena!

⁶⁹ Kabuno, akabalilo kako umbili gwamfu ugu gutwālīgwe kuno, gulipo umbili gwamwambepo gwitendekisye ky gwene. Kangi nakalinga itolo mumo iki...O, aleluya! “Kangi linga ikitembe ikyamfu iki ikyābwitugāsyo bwītu kikusunguluka, kilipo ikingi kimo kugūlila kwisilya.” Nakalinga itolo akabalilo kako uswe tukusōkano itolo ukufuma mu ugu, uswe tukwisa mu gumo gula; gugo gutikulonda ukunwa a misi amatalalifu, gukaya nakyo ukulondigwa kwa kunwa kwa misi; gumo ugu gutikulya, abene bakaya ba lufumbi lwa nkisu mma. Loli abene bo itolo bābwanaloli, kangi babagīle ukwipilika nukuponania amaboko, kangi itolo u lugano kangi kilikyosa kyo kipelelesye. Kangi u mbili gula gukugūlila kula. Ikyene kyo kiyabo kya ikylene. Filipo fitatu fya ifylene.

⁷⁰ Ugwe kwanda u Bumi bwa Syepwa papapa apa pa kigemo. Apa po apa ugwe kwānda u Syepwa. O! Ugwe kwānda u Bumi bwa Syepwa papapa apa. Polelo ugwe upāpīgwe kangi, u mwanundumiana gwa Kyala. Kangi polelo akabalilo kako ugwe kufwa, ugwe kwānda... Akabalilo kako u bufwe bwako bukukutika ugwe mu mbili ugu kangi i ndumbula yikuleka ukukung’usya, kangi amaguludumu gabufwe gikwānda ukwima, akasyūngulu akanini kala kāko kālī nsyūngulu gwa nsyūngulu, mu sekōndi yimoyene ugwe ne gukuya nsyūngulu gwa nsyūngulu, polelo ikyakukōngesya ugwe ne gukuya nsyōngulu, polelo ikyakukōngesya ugwe ne gukuya ubutonye bunini, polelo ikyakukōngesya ugwe ne gukuya kasoko, polelo ikyakukōngesya ugwe ne gukuya kisoko, kangi ikyakukōngesya ugwe ne gukuya nyanja, kangi linga akabalilo kakindilepo ugwe gwimile mu kuyapo kwa baganigwa bako bīmīle kwisilya, bafwikīgwe ni myenda gya mbili gwammwanya, aba umwe mumanyene yumo nu nnine, muganene yumo nu nnine, ugwe gusanukile ukugomokela ku nnyambala unkeke nu nkikulu unkeke kangi. Katikati kotalusya. Ugwe ne gukugūlila mpaka u kwisa kwa Ntwa Yeso. Kangi i lisiku limo u mbili ugwalwimiko gula ugwa Mwene... Lilino kumbukilaga, gula go mbili gwammwanya, komma u mbili ugwalwimiko,

ugwammwanya. Kangi i lisiku limo u mbili ugwammwanya gula gwisakusókako ku Mwanya na Yeso.

⁷¹ “Kabuno une nguyoba iki kwa umwe,” Batesaloniki Gwakibili, untu gwa 5, pamo Batesaloniki Gwakwanda, untu gwa 5, yumo pamo uyungi, “Une nguyoba kwa umwe, une ndikulonda umwe muyege basitakumanya, bakundwe, ukufwana na bala aba bagonile utulo, ukuti umwene mungasulumaniaga mma, bo abangi aba bakaya nalo u lusubilo. Kabuno linga uswe tukwitika Kristi áfwile nukusyúka kangi i lisiku lya butatu, bope na bala aba bagonile utulo mwa Kristi u Kyala isakubatwalaga nu Mwene. Kabuno uswe tukuyoba iki kwa umwe mukwisila mu ngomeléso sya Ntwa, ukuti uswe twe tuli bumi kangi tusyeye ukufikila ku kwisa kwa Ntwa, tutisa kukánisya pamo ukupinga” (i lisyu ilinunu ukukinda gosa) “ukupinga bala aba bagonile utulo. Kabuno i ngangabwite ya Ntwa yisakukwimba, kangi abafwe mwa Kristi bisakusyuka tasi.” Imibili gwammwanya igi gikwisa pási nukufwala imibili gwa mfu, imimikigwe. “Kangi uswe twe tuli bumi kangi tusyeye twisakusanusigwaga nkabalilo, mu kupula kya liso, kangi twisakunyakiligwa mmwanya palikimo na bene, ukwagana nu Ntwa mmwanya.”

⁷² “Une ndisakunwa ikyakufuma ku kipáso kya mpesa pamo ukulya kangi mma mpaka Une ngulya ikyene mbupya na umwe mu Kitangalala kya Táta Gwangu,” u Lusekelo lwa Bwegi. Ku fyinja fitatu na sinda u ndwananakristi amálisísyé ubulagili bwake, ikisu kyosa kibongotoligwe, aba Yuda bakólelélgwe, Yosefu ikwimanyisya mwene ku Bāpanja, pamo ku ba Yuda. Kumbukilaga, akabalilo kako Yosefu álimanyisye mwene ku bakundwe, akálipó na yumoywene u Gwāpanja áli pala. Akabalilo umwene átumile... Umwe mumenye akapango. Yosefu, ikyakwegelela ikipelelesye ikya Kristi, mu kayilo kalikosa. Kangi akabalilo kako Yosefu átumile a bakundwe bake, kangi abene balinkusuluka pási, kangi umwene alinkukéta nukumbona u Benjamini unnini, kangi umwene alinkubabona abene pala kangi polelo umwene... Abene balinkuti, “Panongwa yafiki, umwinitu uyu! Uswe—uswe angali tukangóga unkundwe gwitu, Yosefu.” Aba Yuda bo baketile ukuti abene bábobile u busobi; lilino akabalilo kako Kristi, akabalilo kako Umwene ikwimanyisya Mwēne ku bēne. Kangi Yosefu áli fiyo mwisule, umwene alinkufimbilisigwa ukulila, kifuki, polelo umwene alinkunsósyápo u nkasi na bana bake, na bosa abasikali na balibosa abangi, nukubatuma abene ku nyumba ya bunyafyale. Katikati kotalusya. Kangi polelo mu kuyapo kwa ba Yuda bene, umwene alinkuti, “Une ne Yosefu, u nkundwe gwinu. Une nkundwe gwinu.” Kangi polelo abene balinkugwa nukwanda ukutetema, balinkuti, “Lilino uswe tumenye uswe tukufundigwaga, panongwa yakuti uswe twalingógile u nkundwe gwitu. Uswe twāyobile ukuti

uswe twālingōgile u nkundwe gwitu, kangi lilino umwene yo mwalafyale unkulumba.”

⁷³ Umwene alinkuti, “Kyala ābombile ikyene pa nongwa yimo, ukuponesya u bumi.” Iyo yo katikati nongwa iyi Kyala ābombile ikyene, ukuponesya uswe Bāpanja. Loli a Bāpanja bāli mu nyumba ya bunyafyale. Aleluya! Ukuya nkānigwe na bakundwe Bake, Yosefu, Umwene ālyegile u Nsingiligwa; kangi u Nsingiligwa āli Gwāpanja, komma u Njuda. Umma ndaga.

⁷⁴ Lilino, ko kugu ugwe kubuka lilino? Ukufuma pápo uswe tukufwala u mbili ugu ugwalwimiko, kangi i ngulilo ingulumba iyi yikwisa; akabalilo kako u mbili ugwalwimiko ugu, u mbili gwammwanya ugu gupēlígwe ukuya mbili mwimikigwe. Umwe mukupilikisya iki une ngusanusya lilino? Polelo une mbagile ukwinda ukukilania nukuyoba, “Nkundwe Neville!” Unko une mbapepo ikyakunangisya ikinini. Une nguyoba, “Nkundwe Humes, unko uswe tubuke kwa Papa ulubunju ulu.” Umwene yo Kyala. Uswe tummenye Umwene lilino, Umwene yo Mpoki, Umwene yo Mbumbulusyi.

⁷⁵ Kukālimo siku i kindu kimo bo kupeligwa kwa butulwanongwa. Kila kikāpilikisigwe kanunu, bule ikyene? Ubutulwalongwa bukaya kipeligwa mma. Umma, nkulumba! Ubutulwanongwa ko kusyumbutusya. Alipo yumoywene mwene u Mpeli, yula yo Kyala. Ubutwalonongwa bo bwikemo busyumbutusigwe. Ngimba ubulogwe bo fiki? Ubwikemo busyumbutusigwe. Ngimba ubusyobi bo fiki? Ubwanaloli butwalígwe mbubibi. Naloliloli. Ngimba ikigune kyo fiki? Ikyene kyo sayo sya Kyala sisyumbutusigwe ukuya ku lisyu lya kigune kwa Kyala, mbuyo bwa lusayo. Ubutulwanongwa kikaya kipeligwa mma. Ubutulwanongwa ko kusyumbutusya. Polelo, Sétano akābagile ukupela ubutulwanongwa, umwene āsyumbutwísye itolo ifi Kyala āpelíle. Uko ko katikati kotalusya. Ubufwe bo itolo kusyumbutusya kwa bumi.

⁷⁶ Lilino, ketésya iki—ketésya iki. Polelo une ngwisa kusegelela, kangi une ngwisakuyoba, “Nkundwe Humes, unko uswe ugwe na une, kangi Nkundwe Beeler na bamo ba bakundwe, uswe tukubukaga kwa Papa Kyala. Kangi, tuyobe, unko uswe twege ubwendo ubunini. Umwe balumiana mufiganile ifyamba akabalilo kako. . .”

“Ena, uswe naloliloli twābombile.”

⁷⁷ “O, galipo maelifu-elifu mabili aga ifyene kwisilya nkisu ikipyā. Bukaga nkyeni panja, bētaga pamwanya pa fyene.”

⁷⁸ “Une ngufimibilisigwa uku. . .? . . . ilisuba i lisiku lililyosa, likwisa mmwanya ukufyuka. Une ngwisakukupilika ugwe. Akabalilo kalakala aka abene bakāli bikuyoba, Une ngwisakupilikaga.” Yesaya 66. Uko ko kotalusya.

⁷⁹ Kangi umwe mumenye, une ngwendendeka panja ukukinda kula, twesa ba uswe ukwenda panja ukukinda kula itolo ku fyinja ukufwana bamia bahano, itolo akendelo kanini, elifu-elifu yimoyene, kitikupela nubukindane nabumo, muketile. Kangi lilino—lilino ikyo kikupilikigwa ngati kyabusyutuntu, loli ikylene kyo bwanaloli. Muketile, ikylene kyo bwanaloli, panongwa yakuti ukwene kukayako akabalilo, ikylene yo Syepwa. Kangi akabalilo kako une ngubuka panja pala, une ngwisakwenda ukukindilila ukusuluka ukukindilila kula, kangi umwe mumenye ywani une—une—une ngwaganaga panja pala? Une nguyoba, “Ena, linga kukayako u Kalumbu Georgie Bruce! Panongwa yafiki, Kalumbu Georgie, apene patali ukufuma pápo une nākubwene une.” Ikuboneka itolo ngati umwene bwila. Muketile? Umwene abāgīle ukuya ifyinja maelifu-elifu kalongo mbukusi, loli itolo ukuya nkeke na mumo umwene āyililēmo siku. Umwene isakunkwandaga yumo ku nyuma, kangi une ngukēta kula, ikylene yo Chīta, i ngalamu.

Une nguyoba, “Ulinkafu ulubunju ulu, Chīta?”

⁸⁰ “Niawu,” bo kana ka pūsi. “O, une mfumile kula nguyoba na bamo mwa bakalumbu ukusyungutila abene amaluba amanywamu kubusuluko kula, uswe twāli kula ukufwana ifyinja bamia bahano, muketile, ukukētésya ukusyungutila.” Lilino, ikyo kikupilikigwa kyabusyutano, loli ikylene kyo bwanaloli. Ikyo kyo katikati. Iyo yo njila iyi Kyala ālondaga ikylene.

⁸¹ Ena, asaye i ndumbula yako, Kalumbu Georgie. Ukufulasya nakumo kubāgīle ukwisa, nakimo na panandi. Nkabalilo ka namayolo uswe tukubuka pamwanya pa kyamba, nukuyoba, “O Papa Kyala, une akabalilo kamo nāyongile. O, une akabalilo kamo nāli mu ndipa ya butulwanongwa, Papa Kyala, kangi Ugwe gwalimbokile une.”

⁸² Fiki, a bandu aba bagelile ukuyoba ikyo bābukīle ukuya basyutano. Ena, u nnyambala yula uyu āsimbilie ilinandi lyabumalikisyo ilya yila *O Ulugano Lwa Kyala*, uyu āsingiligwe ku nyumba ya basyutano, uyu āgelile ukuyobapo isya lugano lwa Kyala. Mumo fikuti Umwene alinkwiyufya pási ukupoka abatulwanongwa, kangi mumo Umwene ābombīle, u lugano Lwake ulu lwālisīle pási ukukupoka ugwe na une. Yoba isya kwiputula, a Bandumi bakamanyana nasimo isya ikylene! Ukwiputula, u Gwandumi amenye itolo...Umwene ikwima pala kangi ikufiga amapiko Gake kunyuma na nkyene, kangi ukukilania, “Aleluya! Aleluya!” Loli, o kisa! Akabalilo kako ikylene kikwisa ku kumanya une nāyongile kangi lili une nāgigwe, une nāfwīle, une ndi mumi kangi! O Kyala, une nāli butulwanongwa, une nāli ndipa, kangi une nāli pási mbutagilo-findu!

⁸³ Apa po ikinunu ukukinda-fyosa iki u bumi bwābagīle ukukupaa ugwe. Ngimba umwe mubukilemo siki ukusuluka

apa ku butagilo bwa Colgate? Ukwene ko buyo bwakununga ukukinda-bosa ubu une nāliko siku. Ilyosi ilyaiyolo lila likumbela ukubina itolo ukuliningisya ilyene. Ndāmbaléle pási pala mu lyosi lyosa ilyaiyolo lila, ukuya mbine fiyo pa lwanda lwako, itolo ukusyumbuka nkati muyege panja, ukufuma pakunwa amafuta ga nyemba. Muketile, itolo ukuya mbine mumo ugwe ubāgile ukuya! Kangi i mbemba sikwendendeka mosa mwa ugwe, sikugela ukulya ukusyungutula ugwe. Kangi gula go nununu ukukinda-gosa ugwa bumi. Kangi polelo yumo ikufikila nukukupimba ugwe mmwanya. Kangi ugwe gwe naloliloli gwaiyolo kangi ugwe ukabagile ukwitula gwimwene. Kangi itolo ikukupimba ugwe mmwanya kangi ikukusyumbutusa ugwe ukuya ndumiana gwa fjinjia kalongona-fihano-na-fitatu, ikukutugasya ugwe pamwanya pa kyamba, bulabula ubulenge bwa bukafu, mwe, ubutúyo ubununu ubwa mbepo innunu bo lula, ukunwa kwa misi amatalalifu ukununu. Ngimba ubagile ukulonda ukugomokela ku butagilo kula kangi? Siku, siku, siku, siku ukubuka ku butagilo kangi mma.

⁸⁴ Lilino, ikyo kyo iki ikyene kikusanusya, binangu. Ikyo kyo iki imboniboni yila, pamo ukusāmisigwa, kali kyo fiki, i mboniboni. Une nguyobaga ukuti imboniboni, panongwa yakuti une ngutile ikyo kibagile ukumfulasya u munduyumo ukuyoba ukuti kusāmisigwa, ikyo kyo ikyene kyāli. Lilino, apa po kabalilo kako Kyala . . .iki Kyala ābombile ukutwala abanabalumiana na banabalindwana ku Mwene. Lilino, ngimba a bandu aba bo bāni? Ngimba abene bo siku ba . . .Ngimba a bandu aba bābombile fiki ukufwanisigwa iki? Ngimba abene bābombilēmo siku bulebule ikyene? Kyala, ku bwandilo, bo u Gwandumi ākali akapeligwamo siku . . .Balinga aba bamenye ukuti Umwene yo nsitampaka? Linga Umwene akaya mma, Umwene akaya Kyala. Polelo, Kyala, mu kisa Kyake kisitampaka, Umwene āketile ukuti Lusifala āyaga pakubomba ikyo, linga Umwene āpelile iki. Umwene āyaga pakubabika abene pa bubombelo bwa lwiho lwa bwabuke, u lwalo lula. Kangi ugwe ukāli uli apa, uko ko kotalusya, u mpiki gwa kotalusya nu kusoba fibikigwe pankyene pa aligwesa gwa uswe, umwe tendeka ulusalu lwinu. Kangi Lusifala āli gwakwanda ukwega unsebwe nosobi. Kangi umwene alinkwanda ukukwaba ukufuma ku mwene, nubupafu, ukugela ukwega fyosa ku mwene, ukugela ukutoga pa yumo uyungi. Kangi apo po pala ikyene kyālyandile. Lilino, pilikisya ku iki. Apo po pala ubutulwanongwa bulinkwanda. Kyala, mminogono Gaka amasitampaka, āketile ukuti, kangi āketile ukuti injila yene ntiga . . .

⁸⁵ Lilino, umwe mwe bakundwe bapatatu, une ndikulonda ukubafulasya umwe, loli bulebule mu Ngamu ya Lisyu ilinunu lya Kyala mubagile umwe siku ukumbika Yeso ukuya mundu gwapamwene ukufuma kwa Kyala Mwene? Linga Yeso ābagile ukwega u mundu uyungi kangi ukuntendeka umwene abūke

kangi akāfwe, ukūntabūla u mundu uyu apa, Umwene ikuyaga kindu kisitabugolofu. Yilipo i njila yimoyene ntiga iyi Kyala ābagīle ukubombamo siku ikyene, ko kwegu u buyo Mwene! Kangi Kyala alinkuya mbili ukuti Umwene abagile ukōnja ububabe bwa bufwe, ukwegu ubutito nu bufwe ukusōsyāmo mwa uswe, ukuti uswe tubagīle ukutabuligwa nu Mwene Nafyo. Iyo yo nongwa Umwene isakwiputiligwaga fiyo. Yeso yo mundu, naloliloli Umwene āli. Umwene āli nnyambala, n-n-y-a-m-b-a-la, āpapiḡwe ukufuma mu mfunde Maria. Loli u Mbepo uyu āli mwa Umwene āli Kyala kisita bupime, mwa Umwene mwālitugēsye ubwisule bwa Bwakyala mu mbili. Umwene āli Yehova-yire, Umwene āli Yehova-rafa, Umwene āli Yehova-manase, Umwene āli Yehova; Ingupililo yitu, Ingwamba yitu, Mbumbulusyi gwitu; Umwene āli yo Alfa, Omega, u Bwandilo nu Bumalikisyo; Umwene āli Gwakwanda, Gwabumalikisyo; Umwene Āli, Uyu Ali, kangi Isa Kwisa; u Nsisi kangi Uluyungu lwa Davidi, i Ndondwa ya Ndubunju, panongwa ya fiki, Umwene āli Fyosa-mu-fyosa. Mwa Umwene mwālitugēsye ubwisusye bwa Bwakyala mu mbili!

⁸⁶ Kangi u bufwe akabalilo kosa bwālinalo ululila, ikuti ikyene kyātitaḡa a bandu, “Aa,” u sētano ikuyoba, “Une ngwagile ugwe, panongwa yakuti ugwe umbilikīle une. Ngukutitaḡa ugwe, une ngukubikaga ugwe mwīpumba. Ililopa lya ng’osi lila likabagīla ukukutula ugwe, ilyo lyo itolo lilopa ya kinyamana.” Loli Kyala, mu mahala Gake, āmenye ukuti pikuyangako u Kang’osi ikwisa, ābutiḡwe ukufuma ku lwalo lwa kisu. Ena, nkulumba. Kangi abene. . . Umwene āḡūlīle ku kabalilo kala, ku bwisusye bwa kabalilo ukwisa.

⁸⁷ Loli i lisiku limo akabalilo kako u Kang’osi uyu isile, u Nnyambala uyu, Sētano yōpe āli ntoyofu. Umwene āketile ukusyungutila Umwene, umwene alinkuti, “Linga Ugwe gwe Mwanundumiana gwa Kyala, boma *iki*. Linga Ugwe gwe Mwanundumiana gwa Kyala, bomba ikiswigo kangi unko une ngēte Ugwe kubomba ikyene. Unko une ngēte Ugwe kubomba ikyene. Aa-ha, une ngupinyaga ikifunga ukusyungutila ikisyo Kyake, ngukukomaga Ugwe. Linga Ugwe gwe nsololi, tubula uswe ywani akukomile Ugwe.” Haamu! “Une ndiku—une ndikwitika Ugwe gwe Myana yula. Linga Ugwe guli, tubula uswe nubugolosi mumo Ugwe uyilīle.” Muketile, mosa bo lula. “O, tubula ukuti Ugwe guli!” Umwene alinkusita kwīgula undomo Gwake. O, o, ākwabila Umwene amasapa pamwanya pa maso gake pala!

⁸⁸ Umwene alinkukelengania ukusyungutila ku bafundigwa, kangi alinkuti, “Une āngali njobile kwa Tāta Gwangu kangi Umwene āngali āndumīle Une abamia kalongo na babili aba Bandumi, linga Une nālondaga.” Pilato akāpilike ikyo, umwe mumenye.

⁸⁹ “Linga Ugwe guli! Linga Ugwe guli. O, ikyo kikaya Umwene. Panongwa ya fiki, nkéta Umwene ikusulula i lilopa. Hee, bamo mwe basikali umwe buka kūko kula kangi mfunyila amata pa kisyo Kyāke.” Ukumfunyila, ukumohela Umwene, ukukwaba ukwīsula ifiboko ifya ndefu ukufuma ku kisyo Kyāke. “O, Umwene akaya mma! Nakamo, kila kikaya Umwene mma! Une ngukitikaga ululūla lwangu mwa Umwene, myana. Une ngumwagaga Umwene pa mwanya pala. Une ngwagile Ugwe lilino!”

⁹⁰ Akabalilo kako Umwene ākūtīle kābumalikisyo, “Eli! Eli! Kyalala Gwangu! Kyalala Gwangu!” Yula āli nnyambala. “Panongwa ya ifki Ugwe undagile Une?”

⁹¹ Mu ngunda gwa Getisemani, ukupakigwa kulinkundeka Umwene, umwe mumenye, Umwene āfwile ntulwanongwa ukufwa bo yu ntulwanongwa. Umwene āfwile ntulwanongwa, umwe mumenye ikto; komma imbibi Syake, loli isyangu ni syako. Apo po pala u lugano lula lukwisilamo, mumo Umwene ālyegile isyangu! O, Aleluya! Mumo Umwene ālyegile isyangu!

⁹² Kangi pala Umwene ālipo, Umwene alinkusita kwigūla u ndomo Gwake. Mwenelulūla alinkuti, “Ugwe umenye, une ngwitika yula āli nnyambala gwaitolo itolo. Umwene akāpapigwa mwa mfunde mma, kabuno une nīngīsye ululūla lwangu mwa Umwene.”

⁹³ Kangi apa umwene alinkwisa, ukuyubika ululūla lwāke mwa Umwene, loli kala kāli kabalilo kanyali, myana! Umwene alinkusopoligwa ululūla lwāke akabalilo kala. Umwene akabagila ukutita kangi mma ukufuma kabalilo kala, umwene ālulekīle ululūla lwāke nkati mula. Alinkusyuka pisiku lyabutatu, kangi alinkuti, “Une yo Mwene yuyo āfwile, kangi ndi mumi kangī, kangī ndi mumi kwabilanabwila ukongelelapo, Une ndinasyo i fungulo sya bufwe na gehena.” Ena, nkulumba. Umwene ātoligwe ukunkumbona ukuti Umwene āli ywani. “Kangi panongwa yakuti Une ndimumi, umwe mwisakuyaga bumi numwe. Ikyene kikāli kitikuboneka mma . . .”

⁹⁴ I lisiku limo, amasiku matatu pamo mana ukufuma pala, ukufuma pápo Umwene afyikilege kwa Tāta, āgomokile, polelo bamo bāyobile, “O, Umwene yo . . . Umwene—Umwene abagisenie ukuya kisiyuka. Umwene abagisenie ukuya luko lwa kindukimo ikisyuka ukusyungutila u Myana yula. Kangi uswe . . . Ugwe umbwene Umwene. Ugwe kukéta imboniboni.”

“Umma, Umwene āli yo Yeso ugwanaloliloli.”

⁹⁵ Tomasi alinkuti, “Unko une mfibone ifiboko Fyake na filifyosa, une ngubabulaga umwe linga ikylene kyo kili.”

⁹⁶ Umwene alinkuti, “Apo Une ndipo.” Alinkuti, “Ngimba umwe mulinasyo simo iswi nu nkati pa bwa apo? Ndwalila Une ikimomosela.” Kangi abene balinkuntwalila Umwene

ikimomosela, kangi Umwene ālimile pala nukulya ikyene. Alinkuti, “Lilino, ngima unsyuka gukulya mumo Une ndulyela? Ngimba u mbepo gukuya nu mbili ni fifupa mumo Une njile nafyo?” Muketile? Umwene alinkuti, “Une yo Umwene. Une ne kila.”

⁹⁷ Kangi Pauli āyobile, “Ikyene kikāli kitikuboneka itolo katikati lo luko luki ulwa mbili uswe twisakuya nalo, loli uswe tumenye twisakuya nago u mbili bo ugwa Mwene.” Fiki? Ngimba Umwene ālimo nago siku u mbili gwa bunyakyala gula? Ena, nkulumba! Akabalilo kako Umwene āfwile, i li Bangeli likuti “Umwene,” i pulonauni ya ubwenenakyo kangi, “Umwene ābukile ku gehena nukulumbilila ku myoyo mminyololo.” Aleluya! Ngimba Umwene ābombile bulebule ikyene? Umwene āli ni mbakasya sya kwipilika, Umwene āli ni mbakasya sya kupilika, Umwene āli ni mbakasya sya kuyoba, Umwene ālumbilile nu luko lwa mbili lulalula une nābabwene bala abīmikīgwe mula ikilo ikingi. Umwene ālumbilile ku myoyo igi gyāli mu gehena, igi gikāpindwike mu bufindang’oma bwa masiku ga Noa.

⁹⁸ Loli akabalilo kako Umwene āsyukile pa Paska, ukwene kukāli kwābagile ukuti u mbili gula gububone ububole, kabuno Davidi āketile-ngāni, “Une ndisakuguleka u moyo Gwake mu gehena, somma Une ukwitikisya u Mwikemo Gwangu Yumo ukuketa ububole. Kangi u mbili Gwangu gwise kutusya mu lusūbilo, panongwa yakuti Umwene atisa kuguleka u moyo Gwangu mu gehena, somma Umwene atisakuleka u Mwikemo Gwangu Yula akéte ububole.” Kangi pa sala malongo lwele ukusosyapo isala lwelo bi ububole bwābagile ukwingilamo, u mbili gwabunyakyala bula, u mbili gula ugu gwābukile nu kulumbilila ku myoyo igi gyāli mminyololo, aba bakāpindwie mu bufindang’oma bwa masiku ga Noa, guli nkusyuka kangi, kangi ikyakufya kilinkufwala ikisitakufwa, kangi Umwene alinkwima kangi Umwene alinkulya, kangi Umwene ātubulilo uswe ukuti Umwene āli yo Nnyambala. Aleluya!

⁹⁹ Umo mo muno uswe twisakumbonela Umwene, Nkundwe Evans. Apo po apa Umwene isakwitugasasyaga pa kikota kya Davidi. Aleluya! Pala po apa uswe twisakwendendekaga mosa lilino, une nsangwega ubwendelo na umwe ukukilania ifyamba ku fyinja elifu-elifu, muketile, itolo a masiku manandi, itolo a maminiti manandi, uswe twisakubukaga ukukilania kula, ukwitugasya ukusyungutila kula.

¹⁰⁰ Kangi akene kakwisa kabalilo ka kulya, umwe mumenye, ikindu kyakwanda umwe mumenye, Kalumbu Wood ātile. . . Une nātile, “Kalumbu Wood, ena, ngimba gwāli kugu akabalilo kosa aka? Une ngakubona ugwe ukufwana. . . kikufwana kwa une ukuya no ikyene kyāli maminiti kalongo na mahano.”

“O, kila kyo finyinja maelifu mabili ifi fikindilepo, Nkundwe Branham.”

¹⁰¹ “Uu-huu. Ngimba ugwe kwipilika bulebule?” O, ena ugwe ukabagila ukwipilika nakimo loli bu bununu.

¹⁰² “Tutigi, isa kuno, balumiana, une ngubanangisyaga umwe mwesa i kindukimo, bakundwe, bakundwe bangu abaganigwa. Apo yilipo inyibuko ya misi apa, innunu ukukinda-syosa isi ugwe unwilemo siku. Kangi, o, uswe tukunwaga akanunu akatalalifu. Une ngwisakufikilaga pa mwanya pala nukwega ikipambo ikikulumba ikinywamu ikya mipesa, kangi uswe twisakwitugasya pási kula nukulya ikylene.” Ngimba kila kitisakuyaga kyakwikyela? Ikyene kyo katikati iki ikylene kili. Ikyo kyo itolo ikylene.

¹⁰³ Ngimba uswe tukyagile bulebule iki? Ngimba uswe tumenye bulebule ikylene? Kyala, bo u lwalo lwa kisu lukaligwa, átumanyile-ngānila uswe! Ywani? Bala aba bali m’Kisu ikifingigwe.

. . . ukutumanyila-ngānila uswe ku būfwikígwe bwa bāna ba Yeso Kristi . . . ukufwana nu bwake ubwikyela ubununu ubwa bwigane bwake,

Ku ndufyo sya u Lwake u lwimiko . . .

Ukuti uswe tubāgile ukuntufya Umwene bo mumo Umwene āyobīle. Ikyo kyo iki Umwene āli, Kyala. Uswe tukulonda ukutufya Umwene.

. . . i ndufyo sya lwimiko lwake lwa ipyana, mūmo umwene atu pelile uswe bitikisigwa mu baganigwa. (Mwa Kristi uswe twitikisigwe.)

Mwa yuyo uswe tuli nu butabulo ukwisila i lilopa, ubuswe bwa m-b-i-b-i . . .

¹⁰⁴ Une ngufimbilisigwa ukugomokela ku būfwikígwe, loli une ngulonda ukwima pa “mbībi” apa pa miniti. “Mbībi,” ngimba umwe mukétesisye ikyo? Umwe mumenye Kyala atikuntaga untulwanongwa panongwa panongwa ya kubombambibi? Umwene ikuntaga umwene panongwa yakuya ntulwanongwa. Linga untulwanongwa ikukwesa i ngambo, Umwene atikuntaga umwene panongwa ya ikylene; umwene yo ntulwanongwa, mulimosā. Muketile? Muketile? Umwene akaya nasyo imbibi silisyosa, untulwanongwa akaya nasyo. Umwene yo ntulwanongwa itolo, muketile, umwene akaya nasyo imbibi silisyosa. Loli umwe gmuli nu butulwanongwa, umwe mwe muli Bakristi. Umwe mukuketesya apa umwene ikuyoba ku Kipanga. Ukunyangwa umwene mbugolofu. Muketile? Muketile? “Ubuswe bwa mbibi,” m-b-i-b-i. Uswe tubomba i mbibi. Loli untulwanonwa yo ntulwanongwa itolo, Kyala atikunswa umwene.

105 Lilino, ugwe kuti, “Ena, umwene ābukile panja apa nukuntusulila u mundu. Ngimba kubombaga fiki ifyakufwana ni kyene?” Yila yikaya nayimo iya kabombo kangu. Une ngaya mbumbakangi, une ne ndumbilili. Ululagilo lwisa kupakikisyaga isya ikyo, abene bo babumbakangi. Abene bo . . . “Ena,” bikuti, “umwene ābombile ubulogwe.” Ikyo, ikyo—ikyo kyo yo mbombo ya lulagilo. Ikyo kyo pakati pa mwene nu lulagilo. Une—une—une—une ngaya mbumbakangi, une ndikubumba a bandu kangi mma. Une ngulonda ukubega abene bapinduke. Une nu ndumbilili, muketile, i mbombo yangu ukummwega umwene kwa Kyala. Linga umwene ātulil’inongwa, iyo yo mbombo yake, umwene ntulwanongwa. Kyala ikuntaga umwene pa bupime ubwapamwanyapo. Umwene yo ntulwanongwa ukwanda itolo, umwene ātagigwe ukwanda itolo. Umwene akāfikile nukufika pa lwalo lwakwanda, umwene—umwene—umwene ali napamo. Umwene yo ntulwanongwa ukwanda itolo. Umwene akaya nasyo ni mbibi nasimo, umwene yo ntulwanongwa.

106 Ugwe ukābagile ukusōka panja nukuyoba, “Ubupime *ubu* bo kilo, kagi ubupime *ubu* bo bukaya kilo.” Umma, ikylene kyo kilo kyosa, itolo kilo kyosa. Ikyo kyo iki Kyala āyobile. Uko ko kutalusya, umwene yo ntulwanongwa itolo, ikyo kyo kyosa. “Lilino, umwene ābombile iki, ubupimo *ubu* bo kilo, ubupime *ubu* bo kilo ikyeluke naloliloli papapa apa.” Une mmenye, loli ikylene kili i kilo kyosa, ikyo kyo kyosa. Muketile?

107 Une ngabagila ukuyoba, “Ubupime *ubu* bo bwelu papapa apa.” Umma, ubwene bosa bo bwelu, muketile, itolo bwelu, ugwe mukabagila ukuyoba bo bupime buki. Muketile? Loli linga umwene yo buyo ubutitu mu *iki*, polelo yilipo i ngisi mu kyene.

108 Polelo “i mbibi,” i-m-b-i-b-i, uswe tulinako ukuswa kwa mbibi syitu ukwisila (mu fiki?) mu Lilopa Lyake, i Lilopa ilipala.

. . . *ukufwana nu ni myuma bwa lyāke* . . .

109 Ngimba uswe tukwībwa bulebule ikylene? Panongwa yakuti uswe fikutufwana, uswe tubombile ikindukimo ukuti imbibi syitu sihobokeligwe? Ilyake fiki?

. . . *ipyana*;

110 O, mwe! Nakimo mfiboko fyangu une ngutwala, Ntwa. Nakimo nābagile ukubomba, kikayapo ni kindi iki une nābagile ukubomba. Keta! Umwene ālimmanyile-ngānīla une, Umwene ālingōlīle une, Umwene ālinsālīle une. Une ngālinsālīlīlémo siku Umwene. Umwene ālinsālīle une, Umwene ākusalīle ugwe, Umwene ātusālīle twesa ba uswe. Uswe tukālinsālīle Umwene mma. Yeso āyobile, “Umwe mukālinsālīle Une mma, Une nābasālīle umwe.” Umwene alinkuyoba, “Nayumo umundu abagile ukwisa ku Myangu penepapo Tāta Gwangu ikunkwaba umwene, kangi bosa aba Tāta ambele Une bisakwisaga kwa Une. Kangi nayumo ugwa bene bikutagigwa, mwene yu

mwanundumiana gwa bupyuto, ukufwanikisya i—i Lisimbo.” Umwe muketile? Alinkuti, “Loli bosa aba Tāta ambele Une bisakwisaga kwa Une.”

¹¹¹ O, une nāndile ukukabila fiyo, bule une? Kangi une ndikusōka ngamo ukufuma mu iki. Une ngandako pa iki mpaka na lino. Unko une mbopw, une ngufimbilisigwa ukwisa ku kindukimo papapa apa itolo nakalinga lilino, kangi uswe tukubopelaga. Une ngufimbilisigwa ukugomokela ku bufwikigwe itolo i miniti. O, ngimba umwe mukunswaga une itolo ku—itolu ku miniti yimoyene? Unko uswe twēge iki apa, bamo mwa bandu aba bafumile injila yosa ukufuma ku Georgia apa kwene ku kilo iki, sayaga i ndumbula syabo. Lilino, nkundwe gwen’Georgia pamo gwen’Texas kangi kulikosa ugwe ufūmīle, pilikisya ku linandi ilya 5 ili. Unko tusyungutilepo pa lyene pa maminiti manandi.

Ukuya atumānyīle-ngānīla uswe ku—ku . . .

¹¹² Ngimba i lisyu “ku” likusanusya fiki, i lisyu, “ku”? Ilyene likusanusya ukuti i kindukimo iki uswe tukwisako, ku. “Une ngubuka ku nyibuko. Une ngubuka ku kikota.” Humes, ugwe kupilikisya ikyo? “Une ngubuka ku kigemo.”

*Lilino, Umwene ātumanyīle-ngānīla uswe ku
bufwikigwe bwa bāna ba Yeso Kristi ku mwene,
ukufwana bo Bwake Mwene ubwikyele ubununu ubwa
bwigane bwake,*

¹¹³ Bo bukyele bulinga? Bwāli bwikyele bwa ywani ubwene, ubununu bwa ywani? Bwake Mwene. Bwake Mwene ubwikyele ubununu ubwa bwigane Bwake Mwene.

¹¹⁴ Lilino, ngimba bo fiki “u bufwikigwe”? Lilino uno une nēge iki lilino, une ngamanya ukuti kali. . . une ndikuyaga na kabalilo ukumalisya iki, loli ngukutikaga ikylene. Polelo linga lilipo i lilālusyo, umwe mubāgīle ukundālūsya une pitasi panandi akabalilo kamo mu ndumi, i kindukimo. Pilikisya. Ubufwikigwe bwako bukaya bupāpīgwe bwako mma. Ubufwikigwe bwako ko kubikigwa mbuyo kwako. Akabalilo kako ugwe kupāpīgwa kangi, Yohani 1:17, une ngusubila, akabalilo kako uswe tupāpigwe ukufuma ku Mbepo gwa Kyala, uswe tule banabalumiana bā Kyala. Loli uswe tumānyigwe-ngānīla. Lilino apa po kilipo iki une ngugēla ukutwala kwa umwe, ku banabalumiana ba lisiku lwabumalikisyo, umwe muketile, ku. . . Muketile? Uswe twāmanyiligwe-ngānīla kuli (ku) bufwikigwe.

¹¹⁵ Lilino, lilino apa uswe tuli. Lilino, iki kyo iki kikufulasya i kiPentekosti panini. Abene bikuti, “Une nāpāpīgwe kangi! Ntufye u Ntwa, ndinagwe u Mbepo Mwikemo!” Kanunu. Ugwe gwe mwāna gwa Kyala. Uko ko kotalusya. Loli pōpe ikyo kikaya iki une nguyobapo’mma. Muketile, ugwe gwāmanyigwe-

ngānila ku bufwīkígwe. Bufwīkígwe, ukwene ko kubika-mbuyo u mwanundumiana.

116 Une ndi kifuki fiyo ku kila, panongwa yakuti Becky āmbulife une ukuti une ndi kifuki fiyo ku kyene, umwe mukabagila ukupilika mu nyuma umo. Une ndi . . .

117 Muketile, u mwāna. Balinga aba bamenye indagilo sya bufwīkígwe mu Lwitikano Ulukūlu? Ena, umwe mukētīlēmo. U mwanundumiana āpapígwe. Une ngusubila une ndinakyo ikyene mu bulumbilili bumo. Ngimba kila kyo fiki, Gene, ugwe kukumbukila? Ikyene kili pa tepi yimo. O, ngimba kila kyali fiki? Une—une—une—une ngomilēpo pa kyene. O, ena, une nkyagile ikyene, *Mpilika Umwe Umwene. Mpilika Umwe Umwene*; u bufwīkígwe bwa bāna.

118 Lilino, mu Lwitikano Ulukulu, akabalilo kako u—akabalilo kako u mwāna āpapígwe mu nyumba, umwene āli mwāna akabalilo kako umwene āpapígwe, panongwa yakuti umwene āpapígwe ukufuma ku bapāpi bake, umwene āli mwāna gwa nyumba kangī u mwingila-kilingo gwa findu fyosa. Lilino, u mwanundumiana uyu ākusígwe na bafundi. Bagalatiya, unto gwa 5, ilinandi lwa 17 ukubuka ilya 25. Umma ndaga. Umwene ākusigwe na bafundi, abakusi, abamanyisi. Lilino, ukwegelela, linga une nāli nu mwanundumiana apapígwe, tutigi, une ne tāta kangī . . .

119 Kangi iyo yo nongwa mwa Mwalafyale James, balinga aba binogwinēmo ukusekesya ukutīlisya mu Busimbe bwa Mwalafyale James, alinkuti, “Mu nyumba ya Tāta Gwangu muli imiyumba mingi”? I nyumba, imiyumba mingi. Muketile? Naloliloli, mu—mu masiku aga ili Bangeli lyāsanusiligwe mwa Mwalafyale James, i *nyumba* yāli i “kitangalala.” “Mu *kitangalala* kya Tāta Gwangu muli i miyumba mingi.” Komma mu nyumba, miyumba, loli Umwene ākolīle u Tāta gwa kitangalala iki. Abene bāli nakyo ikyene Kyalibangeli fiyo, mu li Bangeli iyo yo njila ikyene kili.

120 Akabalilo kāko u tāta yumo āli nu ngunda unywamu ugwa maekala-elifu, pamo i kindukimo ikingi, umwene āli ni kibugutila kya bandu aba bītugasyaga pabuyo *bula*. Umwene āli na maboko amapāligwe bikwitūgasya kubwa *kuno* ukupakikisya i ng’osi, umwene āli na bamo kubwa *kuno* ukupakikisya i ng’ombe, umwene āli na bamo *apa* aba bābukāga ku bubeti bwa pamwanya kula amamailosi mia yumo mbūtāli, kangī umwene āli nabo bamo papapa *apa* ukupakikisya i mbene, kangī umwene āli nabo bamo ukupakikisya i mbunda kangī—kangī i findu ifikindane. Umwene—umwene itolo āli ni kitangalala ikinywamu. Kangi umwene itogaga pa ka mbunda kāke akanini kangī itogagaga ukusyungitila ukubuka ku kimo kilikyosa nukukéta mumo abene bābombelaga, ukusenga-

lusyoya kwa ng’osi na filifyosa bo lula. Umwene akāli nako akabalilo. . .

¹²¹ Umwe mukabagila ukumbilika une akabalilo kako une ngwenda ukufuma apa. Une—une—une ngugelaga ukusyala ku nyuma kuno. Ngimba umwe mukumbilika une kanunu itolo papapa lilino, apa? Ketesya.

¹²² Umwene itogaga ukusōkapo, kangi umwene asōkaga ngapo, ukugela uku—uku pakikisya i kyake—kyake—kyaka ikitangalala. Polelo lilino umwene ikulonda. . . U mwanundumiana yula ikwisa ukuya gwakilingo ugwa filifyosa ifi umwene ali nafyo. Umwene yo gwakilingo.

¹²³ Kangi akabalilo kako uswe tukupāpīgwa mu Kitangalala kya Kyala, ukwisila mwa Yeso Kristi, uswe twe bākilingo ba ku Mwanya, bālilanisi na Yeso, panongwa yakuti Umwene ālyegile u buyo bwitu. Umwene alinkuya kwa uswe (mbībi), ukuti uswe tubagīle ukuya Umwene (bugolofu). Muketile? Umwene alinkuya une ukuti une mbagīle ukuya Umwene, muketile, balilanisi nu Mwene. Syosa silikanunu, lilino kumbukilaga, aligwesa gwa umwe.

¹²⁴ Lilino, kumbukilaga, Kyala āmanyīle-ngānila umwe, bu bumanyila-ngānila, ukuti umwe mwāyaga pakwisa ku Iki. Aligwesa ikupilikisya ikyene, fyusya ikiboko kyako, muketile. Kyala, mu kumanyila-ngānila, āmanyīle-ngānila ugwe ukuti kwisaga ku Kisu ikifingigwe. Ngimba i Kisu ikifingigwe kyo fiki ku Nkristi umwisyugu? Fyusya itolo ikiboko kyāko linga ugwe umenye. “U lufingi luli kwa umwe ba bāna binu, ku bene aba bali kubutali. Kangi ikyene kisa kubonekaga mmasiku ga bumalikusyo, ikuti Kyala, ukuti Une nisakōnaga panja ikya Mbepo Gwangu pa mbili guligosa, a bānabalumiana na bānabalindwana.” Kangi mwa Yesaya 28:18, “Ululagilo luyeye pa lulagilo, ulukindi pa likingi; apa panini, apo panini. Kolelela fiyo ku iki kyo kinunu. Kabuno ni milomo igyakitabu ni ndimi isingi Une nisakuyoba ku bandu aba. Kangi ubu bo Butusyo, u—u Butusyo, i kisu kya sabata iki Une nāyobile ukuti abene bikufimbilisigwa ukwingilamo. Kangi, panongwa ya fyosa ifi, abene balinkusita kupilika, loli abene balinkusugusya i mitu gyabo nukusōkapo pala, kangi bālinkusita kupilika Ilyene.” Muketile? Katikati.

¹²⁵ Ngimba ikyene kyāli fiki? Katikati itolo bo bandu bala aba bālisile ukufuma kubutali ku Kenani, pamo ukufuma ku Igupto, injila yosa ukufyuka ukukinda ululangalanga, kangi bālinkwisa kulakula kifuki ku, kifuki fiyo ukuti bōnje imipesa igi gyāfumaga ku kisu kila. Nkundwe, kula, abene abanyambala bala bikulonda ukungwabila ku nyuma kila, kila pa Bahiburi 6. Ngimba une mbāgile ukubomba bulebule ikyene? Bala bo bitiki bāmumpaka, abene batisakulobokamo siku! Abene bakabagila ukuloboka. Yeso āyobile, “Ikyitu. . .”

Abene balinkuti, “Abatāta bitu balyaga a mana ndulangalanga.”

126 Kangi Yeso alinkuti, “Abene bo, aligwesa gwa bene, bafwile.” Ikyo kyo ukupaguligwa. Abene bo, aligwesa gwa bene, bafwile. Uko ko kotalisya. Alinkuti, “Loli Une ne Nkati gwa Bumi ugu gufumile kwa Kyala ukufuma ku Mwanya. U nnyambala uyu ikulya u Nkati ugu, umwene atisakufwamo siku. Uko ko kotalusya. Ena, nkulumba, umwene alinabo u Bumi bwa Syepwe linga umwene ikulya Ugu, Une ne Mpiki gwa Bumi ukufuma mu ngunda gwa Edeni.”

127 Lilino, muketile, abandu aba bikwisa kifuki fiyo! Muketile, linga uswe tukuketesya mu Bahiburi 6, komma ukugomokela ku kila, loli Bahiburi 6, “A bandu aba akabalilo kamo bāpeligwe ukuya balilanisi, ukwisa kifuki fiyo, kangi bonjile ifya fikungilwa Fyakumwanya.” Abene balinkwitugasya ukusyungutila, abene bāfibwene ifya bubumbulusyo fikubombigwa, abene bābabwene a bandu mmaka ga Kyala, abene bakétile imyoyo gikupinduka, loli abene batisakubika ikiboko pa Ikyene. Umma, nkulumba. Umma, nkulumba. “Kangi bonjilemo a maka ga kisu iki kikwisa; kangi linga abene bikugela ukwitendeka ukuya mpya pa bene kangi ukubuka ku bupinduko, ukukéta ukuti abene—ukuti abene bakomelile ku bene u Mwanundumiana gwa Kyala akabubili, kangi babalile i Lilopa lya lwitikano lilyo abene bākemesigwe nalyo. . .”

128 “Une ndi gwa kipanga iki kikwitika mu kwikemesya.” Ikyo kyo kinunu nu mpaka mumo ikyene kikubuka, loli ugwe utikubuka kubutali fiyo mma. Muketile? Ena, nkulumba. U lulangalanga lwābakemisísyé abene. Ena, naloli. Abene bāli ni—abene bali ni njoka ya mukuba kangi ni—ni kigemo kya mukuba, na filifyosa panja pala, ukukemisigwa, loli abene bālingile mu Palestina ku butusyo. Bakābombile. . .

129 Kéta kula mu Bahiburi 4, ngimba umwene akāyobile “u Butusyo ubungi”? Kyala āpelile i lisiku lwa buhano-na-mabili kangi abapélé abene u butusyo pisiku lya buhano-na-mabili. Ubuyi ubungi ubu umwene āyobile isya lisiku lya butusyo, “kangi umwisyugu mwa Davidi.” Polelo Umwene ābapele abene u Butusyo ubungi, “Isaga kwa Une mwesa mwe mukusukulika kangi muli nu nsigo unsito, Une nisakubapaga umwe u Butusyo.” Ingilaga mu Butusyo ubu! Kwa uswe twe twīngile mu Butusyo ubu tulekile ukufuma ku mbombo syitu bo Kyala ābombile ukufuma pa sabata Gwake. Nubusisimikisye. Apo po alipo Sabata gwa Butusyo. Apo po bulipo u Butusyo bwa bwanaloli mu Kisu ikifingigwe iki.

130 U Mbepo Mwikemo yo lufingo lwa bandu. Kangi panongwa ya fiki abene bikulondaga abalumbilili abasukulu aba bikubitikisyaga ukufwala ibundu kangi ukutumula inywili

syabo, kangu ukupaka ilangi pa milomo, kangu abanyambala ukubomba injuga nukunwa ubwalwa nukuyoba isunga, nukindilila nukubombela bo lula, kangu ukwikolela bene bingila kipanga? Fiki, abene bikwegaga ikindukimo bo ikyo nukukana ubulongosi bwa Mbepo Mwikemo! Fiki, i Bangeli lyäyobile ukuti i Lisyu lya Kyala lyo lipyasye ukukinda u lübo ulupyasye imbafusibili ili likutumula pakati ifya kifupa, kangu kope ukukételanganänila isya mminogono ga ndumbula. Ena, göpe na minogono ga minogonelo!

¹³¹ Kangu linga uswe tukugana i kisu pamo i findu fwa nkisu, u lugano lwa Kyala lukaya nukuya mwa uswe. “Bingi aba bikukoleligwa, banandi aba bikusaligwa; kabuno i kipata kyo kifinyu kangu injila yo yakwipapatisya iyi yikulongolela ku Bumi, kangu loli banandi bisakuyangapo aba bisakuyagaga iyene. Bingi bisakwisaga kwa Une mu lisiku lila nukwitugasya mu Kitangalala,” alinkuyoba Yeso, “na Abrahäm, İsaka na Yaköbe. Loli abana ba kitangalala bisakutagigwaga panja, nukuyoba, ‘Gwentwa, ngimba uswe tukabomba iki mu Ngamu Yako? Ngimba uswe tukalumbilila? Ngimba uswe tukäli ba Dokotala *Gwakuti-na-gwakuti* kangu Ntiligwa *Gwakuti-na-gwakuti*?’ ‘Une ngakumenyemo siku ugwe. Sokapo ukufuma pa Une, mwe babomba butulwanongwa, Une ngabamanyamo umwe siku.’ Bakaya bosa aba bikuyoba, ‘Ntwa, Ntwa,’ bisakwingila mula mma. Loli aba bikubomba u Bwigane bwa Täta Kgwangu uyu äli ku Mwanya, abo bo bäbo bisakwingilaga mula.”

¹³² Syo isyo lelo, ukwingila mu Kisu ikifingigwe iki. Ngimba uswe tukwingilaga bulebule mu kyene? Uswe tumanyigwengänila ku kyene. I Kipanga, mukwisila mu bumanya-ngänila bwa Kyala, kimanyigwe-ngänila (ku fiki?) ku luyindiko Lwake, ni pyana Lyake, ku lwimiko, kangu kubwiputulo nu lwimiko lwa Kyala. Papa, itugesye ku nyuma kula ku bwandilo, njeko-mwene, nakimo ikyakunsyungutila Umwene, älondega i kindukimo ukummwiputa, polelo Umwene alinkufwikilangänila nu kumanyila-ngänila i Kipanga, kangu bo ulwalo lwa kisu lukäligwa, kangu alinkubika i ngamu syabo mwa Buku gwa Kang’osi gwa Bumi, akabalilo kako abene. . . abutigwe bo u lwalo lwa kisu lukäligwa, ukuti abene babägile ukubonekela ku lwimiko Lwake kangu ku ndufyo Syake ku bumalikisyo bwa kabalilo, akabalilo kako isakubüngania i findu fyosa mu Nnyambala yumoywene, Kristi Yeso. Whuu! Lwimiko! İkyo kyo ikyene. İkyo kyo itolo. . . Kangu ikyo kyo ikyene palapala pala, nkundwe gwangu, kalumbu. Komma ugwe ukusökapo ukufuma ku Kila.

¹³³ Kyala, ukwisila mu lipyana lyälusälo Lwake, äkolile umwe. Kyala, ukwisila mu lipyana lyälusälo Lwake, abakemesisye umwe. Kyala, ukwisila mu lipyana Lyäke lyälusälo na maka Gake, äbosisye umwe nukubabika umwe mu kisu iki ikya Butusyo. Abene aba bingile mu Butusyo ubu balekile ukufuma

ku buyonge bwabo. Abene balekile imbombo syabo bo Kyala ābombile ukufuma ku Syake. Abene bali nu buhofu ubusitakuyobigwa, kangi bīswile nu lwimiko! U Mpiki gwa Bumi bukuteketa mu bene. Abene bali nu bufindang’oma, ubōlōlo, ubununu, ubutengamoyo bwipelile lwitiko, lwitiko, ukwiyufya, ubōlolo, na fyosa bo ifyo. U Mpiki gwa Bumi gukuteketa mwa bene panongwa yakuti u lusubilo lwabo lukolekigwe mwa Kristi Yeso u nketi gwa Mbepo Mwikemo ikupimba ubusimbe ni fika ni fiswigisyo fikukōnga abitiki. “Ifika ifi fisakukongaga abene aba bikwitika.” Bo abene bikwenda ukukindilila, abene bikubumbulusya ababine, abene bikukaga panja imisyétano, abene bikuyoba mu ndimi, abene bikukéta imboniboni. Abene...Kangi abene bikwenda na Kyala, abene bikuyoba na Kyala. Akayapo u sétano yumo abagile ukubaguta abene, abene bīyimike, ukulondalonda...?... Ukwibwa i findu fila ifyaiyolo, abene bikubindikisya ukubuka ku bupime bwa bukōleligwe ubwapamwanyapo mwa Kristi Yeso. Pala abene balipo. Pala abene balipo. Ikyo kyo Kipanga kila.

134 Ngimba abene bāfikile bulebule kula? Ugwe ukagabila ukuyoba, “Ena, Ntwa, Ugwe umenye, i lisiku limo une nālyandile ukukwesa i ngambo, kangi une ndinkugwa, polelo une nālinogwine une āngali...” O, umma, umma, umma, umma.

135 Ukumanyila-ngānila! Umwene atukōlile uswe, kangi akabalilo kako uswe twālinkongesisyē Umwene ko kabalilo kako uswe tukuyoba, “Kyala, uswe twāsobile kangi twāmaliki. Uswe tukāli na minogono nagamo nagakwipoka twibene. Uswe twāli kayīlo ka ngulube, uswe twāli ngulube ukwanda itolo.”

136 Ugwe kusōka panja ku kibaga kya ngulube nukuketa mama-ngulube ugwaiyolo, nukuyoba, “Lilino, keta kuno, ndindwana ungangale, une ngulonda ukukubula ugwe i kindukimo. Ikyene kyo kisobi kwa ugwe ukunwa amisi ga ndipa.”

137 Umwene abagile ukuyoba, “Oinki-oinki.” Muketile? Lilino, ikyo kyo itolo bo bupime ubu ugwe ulinabo ubwakwiponesya bwako gwimwene. Uko ko katikati.

138 Ugwe kuyoba, “Nkikulu, ugwe ulingafwalaga i myenda bo ulo, ugwe ubagisenie ukufwala nubwifyusi. Ugwe kufimbilisigwa ukubomba *iki*. Ugwe ulingabūkaga ku... Ugwe ulingayaga ni sekelo sya makadi isi mma. Ugwe ulingakwesaga ingambo. Ugwe ulingabombaga *iki*. Bwana, ugwe ulingapimbaga *kila*.”

139 Umwene ikuyoba, “Oinki-oinki. Une nāngile ku *Oinki-oinki*.” Uu-huu. “Oinki,” ikyo kyo itolo bupime bwa iki abene bamēnye. “Ena, une ngukwitikisyauga ugwe ukumanya une ndi itolo mumo ugwe uyilile. Oinki-oinki!” Muketile, abene bikupika ubulongosi bwa Mbepo Mwikemo, kabuno i Bangeli

liyobile ukuti linga ugwe kukigana i kisu ni findu ifya nkisu, u lugano lwa Kyala lukaya mwa ugwe.

¹⁴⁰ Ngimba kyo fiki kikubapela abene ukuya baswigisye? Umwe mwe kikolo ikikemo. Ngimba ugwe ubombile fiki? Gwingile ukufuma ku kisu kila. Ugwe uli mu Kisu ikingi. Ngimba umwe mufikile bulebule kula? Ikyo kyo Kisu ikifingigwe. Ngimba ulwene lo luko luki ulwa lufingo? “Ukwene kwisakubonekaga mmasiku ga bumalikisyo, ikuti Kyala, Une nisakonelelaga u Mbepo Gwangu pa mbili guligosa.” Mwa Mbepo yumo uswe twesa tōsigwe mu Kisu kimokyene ikifingigwe. Amen. Bakundwe na bakalumbu, alekuya, nu bukemesigwe bwa ndumbula, kisita kabini, kisita bulugu, nakimo! Une ndikupasya linga u nkundwe ikuyonga, kali umwene ikuyoba fiki, ugwe kubukaga ukumfwima umwene.

¹⁴¹ Une nabukile ukumfwima u nkundwe yumo pakaya patali mma, abukile mbusobi. Umwinitu unkeke alinkuyoba kwa une, alinkuti, “Ndeke ugwalutamio yula abukege. Ndeke umwene mwene.”

¹⁴² Une ndinkuti, “Linga une ngifikamo siku pa buyo pápo indumbula yangu yitikubuka nu nkundwe gwangu, polelo akene ko kabalilo kwa une ukubuka ku kigemo, panongwa yakuti une ngwile ukufuma ku lipyana.” Une ndinkuti, “Une ngubukaga akabalilo kosa umwene ali nu butuyo mu mbili gwake, kangu une nisakunkōla umwene pa buyobumo mu njila muna.” Ena, mkulumba. Kangu une nalinkōlile umwene, aleluya, ukungomokesya umwene. Ena, nkulumba. Umwene agomokile nkibaga kanunu lilino. Ena, mkulumba. Umwene āngali asobile fiyo ukuya naloliloli bo kisu.

¹⁴³ Akabalilo kanandi aka kakindilepo akabalilo kako une nālimbwene u nkikulu umpelakisa itugesye pala, kangu unsikali gwa serifu alinkungolela une, alinkuti, “Panongwa yafiki, umwene abagisenie ukuya mbupinye.” Alinkuti, “Umwene yo itolo asyumbutwike untu, umwene untu gukayamo.” Umwene—umwene, abene balimbikile umwene mu hoteli. Abene bālisile.

Une ndinkuti, “Uko ko kotalusya mosa.”

¹⁴⁴ Alinkuti, serifu alinkuti, “Panongwa yafiki, Billy!” Une nummenye umwene naloliloli nubunu, kangu nālimmenye umwene ukufuma pápo une nāli kāna. Umwene alinkuti, “Linga kalipo kalikosa aka une mbagile ukubomba ukukutūla ugwe.”

Une ndinkuti, “Uko ko kotalusya.”

Alinkuti, “Ngimba ugwe ubagile ukuntula umwene?”

Une ndinkuti, “Umma, loli *Umwene* abagile.” Une ndinkuti, “Gūlila panandi.”

¹⁴⁵ Polelo abene bālintwele umwene panja pala. Kangu akabalilo kako umwene āsokilēpo akabalilo kanandi aka kakindilepo,

ndutengáno. Ngimba ikylene kyo fiki? Uswe twātumile u lwiputo ukukonga umwene. Ameni! Umwene āli fiyo. . .

146 Abene balinkuti, “Ngimba ugwe kulonda ukummwaga u dokotala?” Balinkuti ku ndume gwake, “Ngimba ugwe kulonda ukummwaga u dokotala?”

147 Alinkuti, “U dokotala akabagila ukubomba nakamo pa mwene.” Kangi ikyo kyo kotalusya. Umwene asyutil’untu; u dokotala akabagila ukubomba nakimo kwa umwene.

Alinkuti, “Ulusūbilo lwitu lwene lo kufika *kuno*.”

Kangi umwene ndinkuti, “Billy, une ndikupilikisya ikyo.”

Une ndinkuti, “Une ndikugūlila ugwe ukupilikisya,” muketile, “ndikugūlila ugwe ukubobomba.”

148 Loli, o, mwe, nine ndikupilikisya ikylene! Umma. Loli, nkundwe, Kyala ku Mwanja. . . Une nāsokilēpo, panja pala akabalilo kamo, i Kindukimo kilinkungōngesya une. Ameni! Ikyeke kikāli ukuti une nālongaga ukwisa, loli, umma, i Kindukimo kilinkungonga une. Panongwa yakuti bo lukāli nukwaligwa ulwalo kisu, Kyala amanyīle-ngānila, aleluya, ukuti uswe tukuyaga Bake, ku luyindiko nu lwimiko Lwake. Pilikisya! Bala bābo Umwene āmanyīle-ngānila, Umwene ātīle fiki? Abakōlile. Uko ko kotalusya? Ngimba Umwene ākukōlile ugwe? Ena! Panongwa ya fiki Umwene akukōlile ugwe? Umwene ābamanyīle-ngānila umwe. Bala bābo Umwene ābamanyīle-ngānila, Umwene ābakōlile; bala bābo Umwene ākōlile, Umwene ābitikisye. Ngimba ikyo kyo kotalusya? Kangi bala bābo Umwene ābitikisye, Umwene abimike! Ameni! Ifyo fyo i Bangeli lyayobile: “Aba Umwene abamanyīle-ngānila, Umwene ābakōlile.” Ingulilo yiliyosa! Bala bābo Umwene ābakōlile, Umwene atalile abimīke. Fiki? Unko une mbala i Lisimbo apa. Umma ndaga.

Ukuya abamanyīle-ngānila abene ku būfwikigwe bwa bāna ba Yeso Kristi ku mwene ukufwana nu Bwake Mwene ubwikyele. . .

Ku ndūfyo sya Lwake u lwimiko. . .

149 O, ngimba mukupilikisya ikylene? Ku ndufyo isya lwimiko Lwake! Ukuti Umwene ābagile ukwitugasya mula mu ngulilo sya Syepwa isi sikuya pakwendaga nkyeni, kangi a bāna Bake bikukūta, “Abba, Tāta! Abba, Tāta!”

150 Kangi a Banumi bikuyoba, “Ngimba abene bikuyoba fiki? Ngimba abene bikuyoba fiki?”

151 Fiyo nubumogi kibonesigwe mwa mwanundumiana unsobi. “Une nāsobile.” “Uyu yo mwanundumiana gwangu. Umwene āsobile loli lino umwene āgigwe. Umwene āli mfwano, kangi umwene mumi kangi. Twalaga apa ingwata indupano, unselekesye unnunu ukukinda-gyosa, ulusambo kangi lubika

ulwene pa lobe lwake. Kangi unko uswe . . .” Yo nongwa iyi akabalilo kako indondwa sya kulubunju s̄imbaga palikimo, a banabalumiana ba Kyala bankulalata panongwa ya buhobofu, akabalilo kako abene balubwene u lubatiko lwa bupoki, Kyala ikubika ingamu yako pa Buku bo u lwalo lwa kisu lukāligwa.

¹⁵² Lilino umwe mukuti, “Calvin itikaga i kindukimo bo ikyo.” Une ngālitike mwa Calvin. Calvin āli ngogi. Calvin alimbikile u nnyambala yumo ku bufwe panongwa yakuti umwene ōsyaga mu Ngamu ya Yeso. Umwene āli nsambuke, alondigwaga ukupinda, yu mwene. Ena, nkulumba. Loli iki umwene āyobile, ukufwana na fimo mwa findu ifi umwene āyobile, fyāli fitalusye. Komma . . . loli iki umwene . . . Akabombelo kake, u nnyambala uyu āgogaga u nnyambala panongwa ya kindukimo bo kila, kila kyo kinyali, kila kyabutulwanongwa. Umma ndaga.

Mulamula umwe a basisye kuli uswe . . .

¹⁵³ O, gūlila, une ngamwaga mma u “bufwīkīgwe,” yula bule une? Ngimba une ngābile fiyo? Unko une ngēte iki i koloko iyi yikuyoba pamwanya apa, iki akabalilo uswe tuli nako. Umma ndaga. Itolo—itololo unko uswe twēge a maminiti kalongo panongwa ya bandu aba bābo bīsile ukufuma kutali fiyo. Kēta. Kēta.

¹⁵⁴ “Bufwīkīgwe,” unko une mbanangisye umwe nongwa yafiki ikyene kikubombigwa lilino. U tāta yumo ali ni kitangalala kinywamu, umwene ikwitoga ukusyungutila. Lilino umwene alinayo u mwanundumiana apāpigwe. O, umwene ahobwike fiyo! (Uyo yo Kyala.) Polelo umwe mumenye iki tāta yula ikubomba? Umwene ikumwaga unkusya, ufundi yulayula unnunu ukukinda-bosa. Ngimba umwe mumenye iki u fundi ali, bule umwe? Umwene yo mmanyisi gwa kusukulu. Umwene ikummwaga u mmanyisi yulayula unnunu ukukinda-bosa uyu umwene abāgīle ukwaga nkisu kyosa. (Kangi polelo uswe tukubuka lilino, pilikisya.) Kangi umwene ikummwaga u mmanyisi unnunu unkinda-bosa umwene abāgīle ukwaga. Umwene itolo atikwaga mma itolo unsyobi, umwene ikulonda undumiana gwake ukuya mwinitu gwanaloliloli.

¹⁵⁵ Ngimba umwe mutikulonda a bāna binu injila yila? Naloli, unkinda-bosa uyu ugwe ubāgīle ukubapa abene! Ena, nkulumba. Polelo linga u mundu umpeligwa ālinogwine ikyo, ngimba ugwe kwinogona ukuti Kyala ikwinogona fiki ukufwana na bāna Bake? Unkinda-bosa Umwene abāgīle ukwaga.

¹⁵⁶ Polelo, umwene ikulonda unnyambala uyu ikuyaga gwa bwanaloli-ndumbula. Lilino, umwene atiku nnyambala . . . ikulondo u nnyambala ukuyoba, “Lilino, kēta, une—une . . . Mwanitu, ugwe itolo bombaga kalikosa ugwe kulonda, lūki.” “O, ena, tāta, uu-huu, umwene ikwendamo kanunu, umwene yo ndumiana unnunu.” Ukumpa ulutufyo ulunini pa nyuma yake kangī iliyoya mu kitili kyake. Umma, umma. U miana yula

ikusosigwa imbombo palapala lilino. Naloli. Umwene ikulonda u nnyamba uyu ikuyaga gwabwanaloli. Linga u ndumiana ikwisa ukuya ntalusyi, mbula umwene. Linga umwene akaya mma, mbula umwene iki kisobile.

157 Kangi linga u tāta gwāpakisu ālinogwine ikyo. . . Ngimba umwe mutikulondaga u nnyambala ukuya gwabwanolindumbula na umwe, u mmanyisi ukuya gwabwanolindumbula ukufwana na bāna binu? Naloli. Ena, ngimba umwe mukwinogona kiliku iki Kyala ikwinogoka? Kangi Umwene amenye; uswe tukamanya, Umwene amenye. Uswe tuli bampala, uswe tukabagila ukumanya. Loli Umwene yo nsitampaka kangi ikumanya.

158 Polelo, umwe mumenye iki Tāta ābombile? Umwene akāyobilemo siku ukuti, “Une ngwegaga u pápa ukuketesya a bāna Bangu.” Kangi Umwene akāyobilemo ukuti, “Une ngubukaga ukwakwega u—u bishopu.” Umma, umma. Umwene akābombilémo ikyo, panongwa yakuti Umwene āmenye u pápa ikuyaga nsobi, momumo yope bishopu. Muketile? Umwene akāyobilémo siku ukuti, “Une ngubuka ukwakwega u nketesigwa-bosa ukuketesya pamwanya pa fipanga Fyangu.” Umma, umma.

159 Umwene alinkwega u Mbepo Mwikemo. Yula āli yo Fundi Gwake, uu-huu, ukukusya a bāna Bake. Umma ndaga. Polelo ugwe kumanyaga bulebule ukuti u Mbepo Mwikemo amenye ikylene? Umwene ikuyobela mu milomo gwa bundu. Ngimba ugwe kumanyaga bulebule ukuti Umwene ikuyoba u Bwanalolo? Akabalilo kako ugwe kukéta u Mbepo Mwikemo ikuyobela mu milomo igi gikuyoba u Bwanaloli katikati akabalilo kalikosa, ukusakikisya kangi ukwisa ukuboneka itolo mbupelelesye, bo yu Samueli ātile, polelo umwe mukumanya ikyo kyo Bwanaloli. Ikyene kikwisa nu kotalusya. Panongwa yakuti Kyala ātile, “Linga umwene ikuyoba kangi iki umwene ikuyoba kitikwisa ukuboneka, komma ukumpilikila umwene, panongwa yakuti Une ngaya nayo umwene mma. Loli linga umwene ikubomba, ena, polelo mpilika umwene, panongwa yakuti Une ndinayo umwene.” Muketile? Mwaketa lelo umwe. Ikyo kyo mumo Umwene ikubombela.

160 Lilino, polelo Umwene ikubuka ukusyungutila. Lilino, ngimba ugwe kwinogona fiki ifi u Fundi abagile ukuyoba linga Umwene abagisenie ukubuka kula kwa Tāta? Nukuyoba, “Abako—Abako abāna bikubombela nikinyanyasi. Une ngukubula Ugwe, ukuyi u ndumiana yula u Gwako, umwene, huu, umwene yo lisambuke. Umwene yo mbeti, Une ngabonamo u mwinitu bo yula! Mwe, Ugwe umenye ifi umwene ikubomba? Kangi u ndindwana yula u Gwako! O, whuu, Une ngamanya ifi Ugwe kubombaka nu mwene. Hmm. Ena, Ugwe umenye fiki? Umwene ikuboneka ngati umwene. . . Umwene ipakile

mosa bo bamo bala abalindwana kwisilya kula. Umfilifisti. Ena, Nkulumba, umwene ikulonda ukubomba bo itolo abene bikubombela.”

“Umwanangu undindwana?”

¹⁶¹ “Ena, u mwana Gwako undindwana.” Ikyo kyo iki u Mbepo Mwikemo ikufimbilisigwa ukuyoba isya kipanga umwisyugu. Yo nongwa uswe tukabagila ukuya nalo ulusasanio. Muketile? Lilino, ikyo kyo kyabwanaloli.

“Bule isya mwanundumiana Gwako? Huu? Ikindu kilakila.”

“Fiki?”

¹⁶² “Ena, Ugwe umenye Ugwe bwila gwātīle ukuti i ng’osi sila sibagisenie ukulya mu ndeka yila pamwanya pala pa Fyakulya fya ng’osi pamwanya pala. Ena, Ugwe umeneye iki umwene ābombīle? Umwene asikāgīle isyene pāsī pa mbubambike bwa lisu. Asyegīle itolo isyene kubusuluke kula nukusileka syene syosa nkasoko, nukusileka isyene silamabalele mbubambike mwa lisu, sikulya impiki gya wīlo, kangi isyene sikupelakisa fiyo mpaka isyene sikutoligwa ukusokamo ukufuma kula.” Abo bābīshōpu, batimi aba bikukana a Maka aga galimo. “Ena, Une ngukubula Ugwe u bwanaloli, Une ngasibonamo untimo gwa ng’osi isyalutende mbumi Bwangu bosa.” Umwene atikulonda ikyo. Umma. “Kangi Ugwe mumenye fiki? I ng’ombe sila pa mwanya pala, Ugwe umenye Ugwe—Ugwe gwābābulīle abene ukulya pa yila—yila indeka ya lusangani pamwanya pala, Ugwe umenye, ukusipela isyene ndupano?”

“Ena.”

“Ugwe umenye iki umwene ikupa i syene?”

“Umma.”

¹⁶³ “Baka abaiyolo abafyongolomia. Ena. Umwene ikusipela isyene singilege mfibugutila na filifyosa. Ugwe ukakēta bo kila mbumi Bwako. Ugwe ukakētamo siku u luko lula mbumi Bwako bosa. Ugwe umenye iki umwene ikubomba? Ukubuka mulamula kula ikukwesa ingambo inywamu, aswiligwe kunyuma. Umwene ali nayo unkasi gwake nu mwene, umwene ikufwala i bundu itolo bo mumo a Bafilisti bikubombela panja pala. Ena.” Iyo yo luko lwa ndumi u Mbepo Mwikemo ikufimbilisigwa ukwega ukufwana ni kipanga umwisyugu. Lilino, ngimba ugwe kwinogona fiki isya ikyo?

¹⁶⁴ Ubo bo bufwīkīgwe. Kiliku Umwene. . . ngimba Umwene ābombīle kiliku? Umwene ātumanyīle-ngānila uswe—uswe ku bufwīkīgwe. Umwene atupele uswe u Mbepo Mwikemo; loli, gūlila i miniti yimo, u bufwīkīgwe, ikyo kyo iki uswe tukuyobapo. Bufwīkīgwe!

¹⁶⁵ “Ena, Ugwe umeneye iki umwene ikubomba? U bishōpu isile ukusyungutila i lisiku ilingi, nukumbula. Umwene āli nu

bulumbilili ubunini pási pala, kangi u bishopu alinkwisapo. U miana yumo, u nkundwe, alinkwisapo kangu iputilaga ababine. Kangi umwene alinkuti, ‘Ugwe imika ikyo!’

“O, o, ena, t̄ata bishopu, une ngubombaga ikyo.’

“Ngimba ugwe utikupilikila.’

“O, umma, umma, t̄ata bishopu, naloli umma.’

¹⁶⁶ “Kangi apa Une ngwisa nukumbula umwene u Bwanaloli mulamula ukufuma mu Lisyu Lyako. K̄eta, apa Ilyene lilipo. Une n̄abalile indagilo Syako ku mwene katikati ikyakubomba, kangi umwene atisakupilika ku syene. Umwene ātile, ‘O, ikyo kyāli kya ngulilo iyingi, u mwanundumiana uyungi akabalilo kamo akangi. Ikyo kitikusanusya kwa une mma.” Mwaketa lelo. Ikyo, lilino ikyo kyo Bwanaloli, mwinangu. Lilino ngimba ugwe utikuketa pápo i kipanga kikapondwa ububikigwa bwake pabuyo, nongwa yafiki uswe tukaya nalo ulusasano, nongwa yafiki uswe tukaya nafyo i findu fikubombigwa? Apo po pápo ikylene kilambalele.

¹⁶⁷ Yoshua ikuyoba, “Gadi, une ngulonda ugwe uku. . . papapa muno apa bulambalele u buyo bwako ukufwana nu lubātiko, u buyo bwako bulambalele apa, papapa apa. Ugwe ingilaga apa, Gadi, kangi itugasyaga apa. Benjamini, ugwe bukaya papapa pási apa. Kangi lilino umwe mwesa itugasyaga kubutali nu mpaka gwa Bafilisti.” Kangi Yoshua ikugomokela, apa abene mosa na mosa mu Bafilisti, ukuya ni fimogo ifinywamu ifyaiyolo, itolo ukumoga bo lula, kangi abakikulu bosa b̄ipakile ilangi, kangi bikumoga ukusyungutula nukuya nakabalilo akanywamu. Kangi Yoshua ikwing’walang’wala muntu gwake, kangi nukuyoba, “Lilino fiki?” Lilino ikyo kyo itolo katikati iki kikubombigwa; komma bosa, ndaga Kyala, komma bosa, loli bingi. Umma ndaga.

¹⁶⁸ Lilino ngimba fyo fiki fikubombigwa polele? Ikyo kyo iki kyāboníke. Ngimba ugwe utikwinogonela ukuti u Nnyambala yula, u Mbepo Mwikemo, ikukosigwa isoni pankyene pa T̄ata akabalilo Umwene ikufimbilisigwa ukuyoba ikyo? O, mwe! “Une—Une—Une n̄alimbulile umwene, loli umwene—umwene—umwene alinkusita kupilikila ku Lyene. Une n̄alimbulile umwene kila, nukunsuma umwene abale mulamula mula mwa Buku. Une n̄alyegile—Une n̄alyegile u ndumbilili unnini ukwisapo nukunnangisya umwene ukuti Yeso Kristi yo yulayula mmayolo, umwisyugu, na bwilanabwila. Kangi Ugwe umenye fiki? Umwene alunkumwitikisya yumo mwa abene—ukumwitikisya yumo mwa bala abaiyolo abatima—mbene ukwisapo pala nukumbula umwene ukuti kila kyāli kya ngulilo iyingi. Muketile? Kangi umwene ānungaga nubunyali fiyo akabalilo kako umwene ālisilépo pala, nu nkusyulu gwa mbene, Ugwe umenye ingambo, kangi Ugwe umenye, na filifyosa bo ifyo, ānungaga nubunyali fiyo akabalilo kako umwene

ālisilépo pala. Muketile? Loli Une ngukubula Ugwe, untimambene yula āli ni sambo isyakufwana sibikígwe pa mwene, kabuno, Une ngukubula Ugwe, linga Ugwe gwatigi usimbe ingamu yake pa kikalatasi, ikyene kikwegaga (amasyu ga pafwa yake) āngali yegile sinda gwa kalatasi ukumalisya amapalo gake. Ena, Nkulumba, abene naloliloli banganile umwene ukukilania kula nkisu kila, loli, Une ngukubula Ugwe, umwene naloliloli akamanya mumo fikuti i ng'osi siswiligwege. Ikyo kyo kindu kimokyene ukufwana na ikyene. Umwene itolo atisakupilika kwa Une mma,” ikuyoba u Mbepo Mwikemo. “Une ngelile ukumbula umwene ukuti Ugwe gwe yulayula mmayolo, umwisyugu, kangu na bwila, loli umwene—umwene itolo akabagila ukubomba ikyene. Umwene yo moga unkulumba unkinda-bosa uyu Une ngetilémo siku mbumi Bwangu. Ena. Kangu i kipanga kimpelile umwene ukuya nketesi-mosa, u bishopu, na fyosa bo ifyo, abandu bosa bikumpilikila umwene. Kangu polelo Ugwe umenye fiki? Abene bikwega fila. . . abene balinakyo i kindu ikyaiyolo pási pala abene bikukikoléla i ‘televizioni.’ Ugwe kwasya ikindu ikyaiyolo bo *ulo*, kangu—kangu abakikulu bala bikwisa pala nukwendendeka, u luko losa ulwa myenda gya sinda. Kangu, Ugwe umenye, bingi ba banabalindwana Bako bi- . . .”

“O, naloliloli nakamo!” Muketile?

¹⁶⁹ Ikuti, “Ena, abene bali. Ena, abene bikubomba ikyene. Hum. Bamo mwa bene bikukútila ulusasanio, Tāta, bamo mwa bene naloliloli bikululonda ulwene. Bamo mwa bene naloliloli bikwenda mu bugoloke, bamo mwa bene bikwimilila itolo ukuya bābwanaloli pa Lisyu lila mumo abene babāgile ukuya. Abangi, Une ngamanya isyakubomba, abene—abene bali kubutali panja pala. Ugwe umenye iki bala abangi bikubomba? Bikubaseka abene, bikuti, ‘Abene bo iyolo kipamba kya basyutano.’”

“Ena, ikyo kikumbela Une ikwipilika mbunyalipo fiyo.”

¹⁷⁰ Loli lilino unko uswe tusanusye ububonekelo. Lilino Tāta, u mwanundumiana Gwake yo ndumiana unnunu. U Tāta gwake palapala—papalala mula, apa alipo u Fundi, u Mbepo Mwikemo. Injila iyi u Mbepo Mwikemo, Umwene āyobile, “Une ngwendaga,” u Fundi alinkuyoba, “Une ne . . .”

¹⁷¹ U mwāna alinkuti, “Une ngwendaga papapa na Ugwe. Une ngubukaga palapala na Ugwe.”

“O, i kyamba kitali fiyo, mwanundumiana.”

¹⁷² “Une ngubukaga palapala na Ugwe. Une ndi nu lusubilo mwa Ugwe. Linga une ngwanda ukuya nkatale, Umwene isakufyusyaga ikiboko kyangu nu kungolelela une ukukindilila.”

“Loli silipo i ngalama pamwanya pa kyamba pala!”

173 “Kikaya ni mbombo pene pápo Ugwe ulipo, kitikupela na kayabo kanini aka bukindane. Une ngwendaga palapala kifuki na Ugwe.”

“Lulipo u lutamia pamwanya pala, agene go mabwe matelemuke.”

174 “Une ndikupasya, pene pápa Ugwe kungōla ikiboko kyangu, une ngwendaga kifuki na Ugwe. Une ngwendaga kifuki na Ugwe.”

“O, ugwe umenye fiki? U Tāta gwako ālisibile ukubomba ikyo, muketile. Ikyo kyo kinunu. Ena, nkulumba.”

175 Ukufyuka pamwanya pa kyamba pala. “O,” Umwene alinkuti, “Umwe mumenye fiki, Tata? U mwanundumiana Gwako yo afwene itolo kapyatigwe ukufuma ku kisinga ikyaiyolo. Umwene yo kifyasyale, katikati bo Ugwe. I Lisyu lililyosa ili Ugwe kuyoba, umwene ikuyoba ‘ameni’ ku Lyene. Une—Une nālisanwisye umwene kula ku i Bangeli i lisiku ilingi, kangi Ilyene lilinkuti, ‘Yeso Kristi yo yuyo mmayolo, umwisyugu, na bwilanabwila.’ Ugwe mumenye iki umwene āyobile? Umwene alinkulata kangi alinkusōpa amaboko gake mmwanya, kangi alinkuti, ‘Aleluya! Ameni!’ O! Kangi Ugwe umenye Ilyene lyāyobile, mu—mu Lisyu Lyako, Ugwe umenye, pápo Ugwe gwāyobile, ‘Imbombo, umwene uyu ikwitika pa Une, imbombo isi Une ngubomba isakubombaga yope?’”

176 “Ena, Une ngukumbukila ngusimba Ikyo ku mwanundumiana Gwangu. Ena, Une ngukumbukila ngusimba Ikyo.”

177 “O, akabalilo kako umwene akibwene ikyo, umwene itolo alinkulata nu kunyelenyela, ukuywega, ‘Aleluya, Ntwa. Ega i kisu kyosa ukufuma mwa une. Mbela une bo Kila!’ Ena, Nkulumba. Kangi fyosa i findu ifyo ifi umwene abobile!”

178 “O,” u Tāta āyobile ikyene, “Une ndi—Une ndi nhobofu panongwa ya ikyo mwanundumiana. Ikyo kyo kinunu mwanundumiana. Umma ndaga. Kyunga i liso pa mwene pa fyinja finandi, keta mumo umwene—keta mumo umwene ikwisila nkyeni, kangi mumo umwene ikukindilila.” Linga kakindilepo akabalilo ifyinja fikindilepo. “Umwene ikuwenda bulebule mula?”

179 “O, mwe, umwene ikukula mópe na mu lipyana! O, mwe! Umwene yo itolo...Umwene ikokya amatengele. Une ngukubula Ugwe, umwene—umwene yo naloliloli...Fiki, umwene ikusyega i ng’osi, abagile ukusikolelela isyene itolo—itolu bo Ugwe kubombela. Umwene atisakusipamo siku isyene ilisyu lya mwasumbi. Umwene atisakupamo siku isyene u fyongolomia. Akabalilo kako abene bikwisapo pala, bikuti, ‘Uswe tukulonda ukwingila i kipanga’ umwene ikuti, ‘Gala undomo gwako, ugwe utikulondigwa kila! Umma, nkulumba.

Apo po kilipo iki ugwe kulondigwa, “Pinduka kangi gōsigwe, aligwesa gwa umwe, mu Ngamu ya Yeso Kristi, ku busyule bwa mbibi syinu. Umwe mwisa kwambililaga ikyabupi kya Mbepo Mwikemo.” Ena, Nkulumba, ubo bo ikyo umwene aayobile.”

“O, ngimba umwene naloliloli ikuyoba isyo?”

“Ena, Nkulumba, umwene naloliloli ikubomba.”

“Ena, iyo itolo yo njila iyi Une nāsimbile Ilyene.”

“Iyo yo njila itolo umwene ikuyoba Ikyene.”

“Hmm!” Ena, nkulumba.

¹⁸⁰ “Bamo mwa bene bātīle, ‘Gūlila umwe nkaya ka Yerusalemu mpaka umwe mupegigwe na maka ukufuma ku Mwanya. Ukufuma pāpo u Mbepo Mwikemo isile pa umwe, umwe yaga baketi kwa Une mu Yerusalemu, Yudai na Samaria, ni fiyabo fya kubutali fiyo ifya kisu.’ Akabalilo kako umwene ābalīle kila, alinkuywega, ‘Aleluya, ikyo kyo iki ugwe kulondigwa!’ Ugwe umenye iki umwene ikubomba? Umwene ikubega abene palapala pāsi pala mpaka abene bikupilikisya Ilyene, ikyo kyo kyosa, ikwitugasya kifuki na bene.

¹⁸¹ “Kangi linga abene bikwanda ukūmana, umwene ikuyoba, ‘Eee, eee, eee, gūlila itolo i miniti, gūlila i miniti. Iyo yo njila imbene, komma i ng’osi.’ Muketile? Muketile? O, utubalilo tumo abene bikukalalisigwa nu mwene, loli umwene nu luko lumo ikubakimisyā pa nyuma panini, ikuti, ‘Gūlila i miniti, sh-sh, sh-sh, sh. Ikyene kili kanunu.’ Umwene naloliloli amenye ukulagila i ng’osi sila. Ena, Nkulumba, Une ngukubula Ugwe.

¹⁸² “Umwe mumenye fiki? Une numbwene u Bishopu-Nkulumba *Gwakuti-na-gwakuti* ikumbula umwene ukuti umwene ‘akābagile ukwisa nkaya *aka* nukuya nu lukomano.’ Loli, Ugwe umenye, Une mu luko lumo nālindongolile umwene, Une ndinkuti, ‘Buka mulimosa.’ Uketile? ‘Gomosya ama tepi aga, kangi komma ukugitikisya agene ukuti gabukege panja.’ Uswe twābukile mulimosa! Twābukile ukukilania ntwaya utu apa, alinkuti, ‘Ena, uswe tutisaku kubik’ihel- . . .’

¹⁸³ “Kangi Ugwe umenye, u sētano alinkwisa ukusuluka kula, alinkuti, ‘Une ngukulapila Ugwe une mbagile ukunkyunga umwene panja pa kaya kala.’ Une ndinkuti, ‘Ukabagila ukubomba ikylene. Linga une numbulile umwene ukubuka, umwene isakubukaga. Une ngukulapila ugwe umwene ikubukaga.’ ‘Umma, umma, umma, umma, umma, umma, une ngumbula umwene. Une ngusulukaga pāsi nukuyoba, “Lilino, bosa abatuli bangu, umwe mwesa komana palikimo. Umwe mutikulonda nakimo kya kila ikyabumilisi ubwaiyolo pāsi pala, fyosa fila ifya bumbulusi Bwakyala na fila i findu fwa Mbepo Mwikemo gwayolo. Kila kyākindile kunyumba na batumigwa ifyinja ifi fikindile. Umwe umenye ikyo kyo kikaya kinunu, kunyuma

kula.” Ukugela ukubapa abene bala abafyongolomia abaiyolo, filifyosa bo fila. Abene. . .

184 “Loli, Ugwe umenye fiki, umwene ābukile kulakula pási pala pópe. Alinkubuka kulakula pási pala nukwanda ukusópa i ndeka, ukufuma. . .Kangi Ugwe umenye fiki, i ng’osi sila silinkwanda ukulya, isyene syandile ukutupa mumo isyene sibagile ukuya. Ena, Nkulumba. Akabalilo kosa aka isyene sikuya nu bumbulusyo ni ngomano kangi, Ugwe umenye, bingi ba bene abinitu abakeke bikwanda. Fiki, abene bakétile ukuti linga abene balinakyo ikubugutila ikinywama ikya ndeka bo ga maluba gala. Ugwe umenye iki abene bābombile ni kyene? Ilyene lyāli linunu fiyo mpaka abene balinkubopa ukukilania ku bapalamani, nukuti, ‘Ōnja Iki! Onja Iki! Onja Iki!’ Kéta, ifyakusyungutila kula fyanogaga itolo bo iki papapa apa. Apa Ilyene lilipo apa. Papapa apa Ilyene lilipo, muketile. ‘Tolo pinduka, aligwesa gwa umwe, kangi ōsigwága mu Ngamu ya Yeso, muketile, umwe mukuyaga nu Mbepo Mwikemo. Ikyene kyo kwa aligwesa uyu íganile, unko umwene íse, unko umwene íse apa ukukéta iki i Bangeli lyāyobile.’ Muketile? Kangi abene bikuya itolo na kabalilo akakulumba pási pala.”

185 “O, uyo yo mwanundumiana Gwangu! Uyo yo ndumiana Gwangu. Ena, Ugwe kwino gona umwene akile kanunu?”

186 “Ena. Naloliloli ngwitika,” alinkuyoba u Mbepo Mwikemo. “Une numpele umwene ingelo. Miana, Une nūngelile umwene *muno*, nūngelile umwene *mula*. Une nunsōpíle umwene pási, mbine, Une nūmbikíle umwene pási. Une nūnkanyangile umwene, Une numwitikisye u sētano ukubomba kilikyosa ku mwene umwene ābagile ukubomba, umwene alinkugomokela itolo mmwanya kangi. Umwene alinkwisa itolo yulayula. Muketile, ukufyuka mmwanya kangi. Une nūmpelile umwene ukuya mbine. Une mbombile *iki*. Une nūnsopíle umwene nkipatala. Une nūnsosisye umwene panja apa Une mbombile *iki*, Une mbombile *kila*. Une nālinsyumbutwísye u nkasi gwake ukulwana nu mwene, Une nāsyumbutwísye abapalamani bake ukulwana nu mwene, Une nāsyumbutwísye kilikyosa. Kila kikāpelile na kayabo kanini ka bukindane. Alinkuti, ‘Palema nalinga Umwene ikumbuta une, pópe une nisakunsubilaga Umwene.’ Une nāgogile i nyumba yake. Une nālyegile *iki*, Une nābombíle *iki*, Une nābombíle kyosa *iki*, Une nābombíle *iki, kila, ikingi*. Pópe umwene alinkwima mulamula mmwanya, ‘Palema nalinga Umwene ikumbuta une, pópe une nisakumbombelaga Umwene! Umwene yo gwangu!’”

187 “O! Ena, Une ngwitika Uswe tukulondigwa ukunkōlela umwene ku buyobumo ku buyo ubunini ubwipagule nukuya nu bufwīkīgwe.”

188 Lilino, akabalilo kako u tāta, mu Lwitikano Ulukūlu, āpilikisye ukuti u mwanundumiana gwake isaga ukuya nkusi,

kangi ākīle ukubuka ku bufwīkīgwe. Ku! Abene bapapigwe ukuya mwāna, loli, akabalilo kako abene bo mwāna palapala polelo. Loli polelo abene batisakuyamo siku bakinde itolo pa mwāna, itolo u mwāna gwa paliposa, mpaka abene bikukya kangi bikunāngisya ukuti abene bali. Polelo, umwene ikunkōlela umwene panja polelo.

¹⁸⁹ Lilino apa uswe tulipo, kipanga. Ngimba umwe mwitendekisye? Lilino ukwene kwīlile panandi, aligwesa luma u lōbe lwako, tita u moyo gwako, kangi kwāba i ndumbula yako, itolo ku miniti yimo. Muketile? Lilino uswe tukubuka ukukibika i kipanga pa buyo. Lilino akabalilo kako i kipanga kikwisa pa buyo bula, Umwene ikuyoba, “Manasesi, ugwe ubwako bo pa bwa apa. Ephraimu, ugwe ukukilania apa.”

¹⁹⁰ Polelo umwene ikummwega umwene panja ku buyo bumo, u tāta ikubomba, kangi umwene ikummwikasya pa buyo ubwa pamwanya bo *ulu*, kangi umwene ikuya nu lusekelo, kangi abene bosa bikwisa ukusyungutila. Kangi umwene ātigi, “Une ngulonda aligwesa ukumanya ukuti uyu yo mwāna gwangu, kangi une ngūmfwīka u mwanundumiana gwangu. Kangi une ngulonda yumo aligwesa āmanye, ukufuma umwisyugu, ukuti i ngamu yake. . . Une ngūfwīka umwene, imyenda imipaguligwe pa mwene. Kangi une ngulonda umwe mumanye ukuti i ngamu yake yo itolo nnunu pa kalatasi gwa cheki bo yi ngamu yangu yili. Umwene yo mwāna gwangu, une ngūmfwīka umwene mu nyumba yangu, palema nalinga umwene āli mwanundumiana gwangu ukufuma bupapigwe bwake. Ukufuma papo umwene ālyambilile u Mbepo Mwikemo, umwene āli mwanundumiana Gwangu. Loli lilino une ngumbikaga umwene pabuyo mu bulagili. Uyu umwene ikukagaga yo akagigwe, uyu umwene ikukwingisya g’imbombo yo ingisigw’imbombo.

¹⁹¹ “Kangi naloliloli, naloliloli, Une nguyoba kwa umwe, linga umwe mukuyoba ku mpiki ugu, linga umwe mukuyoba ku kyāmba iki, ‘Samisigwaga,’ kangi mutikwilamwa nu ndumbula yinu, loli mukwitika ukuti iki muyobile kisakubonekaga, umwe mubagile ukuya nako iki umwe muyobile.” Muketile? Apo po umwe mulipo; apo po umwe mulipo. Muketile? “Umwene yo mwanundumiana Gwangu.” Balinga bamenye ukuti u bufwīkīgwe, ukuti i. . . abene bāfwīkāga u mwanundumiana ukufuma pápo umwene āsisimikisye ukuya yo. . . Aligwesa uyu abalilemo siku i Bangeli, ukubika mbuyo u mwanundumiana.

¹⁹² Lilino, Kyala ābombile i kindu kilakila ku Mwanundumiana Gwake akabalilo kako Umwene ālimmwegīle Yeso pamwanya pa Kyamba Kusanusigwa. Umwene ālimmwegīle Peteri, Yakōbo na Yōhani pamwanya pala, abo bo bakēti batatu ba kisu. Ālipo Yeso, Mōse na Eliya, kangi Kyala pamwanya pa kyamba. Pala abene balinkwima pamwanya pala pa kyamba. Kangi, ikindu kyakwanda umwe mumenye, abene bākētile, kangi Yeso

ālimikigwe pankyeni pa bene. Ngimba uko kotalusya? Balinga bamenye ukuti ilyo lyo Lisimbo? Ngimba Umwene ābombile fiki? Umwene—Umwene alimfwikile Umwene mu nselekesye gwa kusitakufwa. Kangi umwene alinkuti, “Imyenda gyake gilinkumulika bo lisuba.” Ngimba uko kotalusya? Kangi i libingo lilinkubakupilila abene. Kangi Peteri na Yohāni na bene, balinkugwa pa fisyo fyabo. Kangi abene balinkukéta, kangi pala palinkwima Mōse na Eliya, bikuyoba ku Mwene. Kangi Mōse āli mfwe, nukusyiligwa mu lipumba ilisita kusimbigwa ku finyinja aba mia lwele. Kangi Eliya ālyegile ulutoge lwa gileta ukubuka ku Mwanya, ifyinja ba mia bahano bo pakāli ukufika pala. Whuu! Loli abene bākāli bāli pala! Pala abene bayobaga kwa Umwene. Muketile, Umwene ālimwegile Yeso pamwanya ukubabona abene, ukukéta iki ikyene kyāli fiki mosa, ukukéta kula, ukunnangisya Umwene ifindu ifi. Kangi abene balinkuyoba nu Mwene, bāli nu buyobi nu Mwene.

¹⁹³ Polelo nakalinga itolo bo Peteri aketile ku nyuma kangi kangi ulwimiko lulinkusōkapo pa Yeso, abene balinkumbona Yeso mwene, kangi i Lisyu lilinkwisa ukufuma mu libingo, kangi lilinkuti, “Uyu yo Mwanundumiana Gwangu unganigwa, mpilikila umwe Umwene! Ingamu Yake nnuu itolo bo yi Yangu lilino. Mpilikila umwe Umwene!” Apo po loli, afwikigwe, pamo abikigwe banabalumiana.

¹⁹⁴ Lilino, kula ko kūko Kyala ikugela ukwegela i kipanga kyaPentekosti mu Buku gwa Efesi. Muketile? Ngimba umwe—ngimba umwe mukupilikisya? Uswe tukufimbilisigwa ukwigala panongwa ukwene kwandilo ukwila fiyo, muketile, abanike bandile ukuya bātulo. Kangi une nālundaga ukwisa pāsi apa ku linandi ili papapa apa, loli une ngabagila ukubomba ikyene, mpaka i—i linandi lya 13, muketile, akayabo ka bumalikisyo, “myatiligwe nu Mbepo Mwikemo ugwa lufingo.” Uswe twisakufikaga kuli ikyo pa Ndungu, muketile. Kéta. Lilino, bulebule, fiki kikututwala uswe muno, kangi mumo uswe tukukyungigwa na Iki.

¹⁹⁵ Loli lilino uku “bika,” ugwe uli bulebule? Ugwe gwe mpapigwa gwakwana mu Kitangalala mu Mbepo Mwikemo. Balinga bakimenye ikyo? Umma ndaga. Ikikōnge, ugwe umanyigwe-ngānila ku fiki? Bufwīkigwe. Ngimba ikyo kyo fiki? Ugwe umanyiligwe-ngānila ku bubika pabuyo.

¹⁹⁶ O, Kalumbu Scott, une ngusubila umwene yo yuyo, itugesye apa. Ngimba ukaya yo ugwe gwe gwāli ku nyumba umwisyugu? Ikimanyisyo kikusyungutila kubuyo bumo nkisu, ukusyungutila ifiyabo ifikindane ifya kisu, une mbilike isya ikyene, bingi, ukuti Yeso ali apa pa kisu, ikwendendeka mu mbili, Umwene ikwisa nkati kangi ikubomba *iki*. Ubo bo butungulu! U Mbepo Mwikemo Gwake ali apa, kangi Umwene ikugela ukubika mbuyo i Kipanga Kyake, ukikutwala i Kipanga

Kyāke ndubatiko, ukukibika Ikyene mu Kisu ikifingigwe, polelo abene babāgile ukwingila . . . ukuti bosa abalugu babāgile ukukagigwa panja.

¹⁹⁷ Manasesi akabagila ukwega i kisu ikyake. Une ngabagila ukuya nu bubombelo bwa bubumbulusi akabalilo kako sinda gwa i . . . akabalilo kako i . . . Une ngusōka panja pala nukulumbilila u losyo mu Ngamu ya Yeso Kristi, kangi i—kangi abakundwe ba butatu bikuyoba, “O, umwene yo gwa Yeso Mwene.” Kangi une ngabagila ukubuka ukukilania kuno nukuya nu bubumbuluso Bwakyala akabalilo kako sinda gwa bene bikuti, “Ububumbuluso Bwakyala buli kanunu,” kangi bingi ba abene bikwikyela ifiswigisyo fya Ntwa nukuyoba, “Ena, une ngwitika u Nkundwe Branham yo nsololi, loli unko une mbabule umwene ikindukimo. Akabalilo kosa u Mbepo ali pa mwene, kangi umwene ikuketela-isyankati, umwene yo gwambombo gwa Ntwa. Loli i Kimanyisyo kyake kyo kibolile, Ikyene kikaya kinunu.” Kali ywani apilikēmo u luko lwa bubole ulu? Ikyehe pamo yo Kyala pamo ikyene akaya yo Kyala. Uko ko kutasuya. Ikyene kyo pamo yo Kyala pamo akayapo Kyala. Iyo yo njila iyi yili. Loli ngimba ugwe kuyaga bulebule? Manasesi atisakukyunga u buyo bwake, Efraimu atisakukyunga u buyo bwake, Gadi atisakukyunga u buyo bwake, Benjamini atisakukyunga u buyo bwake, abene bo bosa bikubopa panja apa na Bafilisti, kangi bosa bafuluganisigwe itolo. Ngimba uswe tukubikigwaga bulebule mbuyo? Loli uswe tupāpigwe mwa Mbepo Mwikemo, twesa ba uswe. Ngimba ikyo kutasuya? Ngimba uswe tupāpigwe ku fiki? Tumanyiligwe-ngānila . . . Polelo ukufuma ukuya mpāpigwe, uswe tukumanyiligwan-gānila ku bufwikigwe, ukubikigwa mbuyo mu Mbili gwa Kristi. Umwe mukukibona iki une ngusanusya?

¹⁹⁸ Ngimba u Mbili gwa Kristi go fiki? Bamo bo batumigwa, bamo basololi, bamo bamanyisi, bamo balumbilili, kangi bamo batimi. Ngimba isyo ndalusye? Uswe tukukoleligwa ku. Abangi bali ifikungilwa fya ndimi, ukusanusya kwa ndimi, amahala, ubumanyi, ifiswigisyo, ukubomba ifiswigisyo, fyosa ifi fikungilwa ifikindane. Kangi lilino fiki ifi abene bikubombaga? Abene bitendekisye ikyo panandi. Fiki? Unko ikyene kyende nubwabuke itolo bo fikuti une ngamanya fiku. Yumo ikufyuka mmwanya, ikuyoba mu ndimi, kangi uyungi yumo ukukindilila, ukuyoba, “Blrr, blrr, blrr, blrr, blee.” Uu-huu. Undumbili isakulumbilaga, ikutendeka ukukōlela kwa kukigemo, kangi u munduyumo ikufyuka mmwanya, ikuyoba mu ndimi, “Aleluya! Lwimiko kwa Kyala!” Linga u—linga u ndumbilili ikukindilila nu bulumbilili bwake, ukuya mpakigwe, polelo a bandu bikuti, “Ungomokela nyuma gwayiolo.” Muketile, iyene yo nongwa yakuti abene bakamanyisigwa.

¹⁹⁹ Ili Bangeli lyāyobile u mbepo gwa nsololi ikupilikila ku nsololi. Kyala akaya yo mwati gwa bufuluganiko mma.

Akabalilo kako une nimile apa, pamo u gwambombo apa pási pa bupakigwe bwa Kyala, kali ugwe kulonda bulebule ukuyoba mu ndimi, ugwe kolelela u lutengano lwako mpaka Kyala amalile apa. Polelo linga ugwe kuyoba mu ndimi, ikyene kikabagila ukuya itolo ukwandisya kumo ukwa Lisimbo, panongwa yakuti Kyala áyobile komma ukubombela ukwandisyakwandisya kwaitolo. Loli iyene yo ndumi yitalwile ku mundu yumo. Ndalusya une akabalilo kamo, bika u lóbe lwako pa kabalilo kamo aka u Mbepo Mwikemo siku, nkabalilo ka kuketa-isyankati, ukumbula u mundu yumo, ályandisye i Lisimbo kingi kingi. Ikyene kyābabulíle abene ukuti i kindukimo kyāli kisobi na bene kangi i kindu kimo iki abene bābombile, kangi i kindu kimo iki abene bikufimbilisigwa ukubomba pamo i kindu kimo kyāboníke, pamo i kindu kimo bo ikyo. Ngimba uko kotalusya?

²⁰⁰ Momumo kuyífile ukuyobela mu ndimi nu kusanusya! Linga alipo yumo mu kipanga uyu ikuyoba ni ndimi, kangi uyungí ikusanusya ikyene, unko ikyene kiyobe iki: Unko u Nkundwe Neville asumuke mmwanya nukuyoba ni ndimi, kangi u nkundwe uyu apa abike ukusanusya, ayobege, “Mbula u nnyambala uyu ukuti mmayolo umwene ábukíle panja apa kangi ábombile i kindu kimo iki umwene akābagisenie ukubomba. Lilino u dokotala álimbulile umwene umwisyugu umwene áli na kansa. Buka katendeke i kindu kila ukuya kitalusye, gomokela apa nukuya ntalusye na Kyala.”

Unnyambala ikuyoba, “Naloliloli, ubo bo bwanaloli.” Polelo Kyala ali na ugwe.

²⁰¹ Loli bulebule uswe tukubukaga ukubomba ikyene mu njila iyi? Muketile? Ikyene kyo itolo, “Blmp, blrr, blrr, blrr.” Itolo nubufuluganie, injila yiliyosa, kisita kubikigwa pabuyo na panandi posa. Lilino ikyo kyo. . . Muketile, Baefesi, bikugela. . . Muketile, abene bikupondwa kila. Keta mumo abene bikupondwela ikyene? Uswe tumanyigwe-ngānila ku bufwíkigwe bwa banabalumiana! Lilino balinga aba bikupilikisya iki une ngusanusya? Fyusya mmwanya ikiboko kyako. Bufwíkigwe! Uswe tupāpigwe mwa Mbepo gwa Kyala, naloliloli, ambulila u Mbepo Mwikemo, kangi kúta, “Abba, Tāta! Aleluya! Lwimiko kwa Kyala!” Uswe twe, uko ko kotalusya, uswe twe bāna, loli uswe tukabagila ukufika nakumo. Uswe tukabagila ukunkoma u m’Filisti.

²⁰² Kéta u Billy Graham imile ukukilania kula. Kangi yula ugwa Mohamadi ikuyoba, “Sisimikisya Ikyene.”

²⁰³ Keta u Jack Coe imile pási kwisilya. Kangi unkanakyala yula, uyu i church of Christ bikuponania amaboko nu nkanakyala panja pala, kangi ukwega ikiboko. Babāgíle ukuya Nkristi, kangi ukukolana maboko nu sétano bo Joe Lewis, kangi yo mmwabuke mminogono, kangi ikutuka nu Kyala kangi áyobile, “kikayako ni kindu kya lukó bo Kyala, mulimosa,

nukwanda itolo,” kangi ni findu bo ifyo. Kangi i kipanga iki bikwikolela bene kipanga kya Kristi, bikuponania amaboko nu mwene, kangi ululwana nu Nkundwe Jack Coe. Uswe tukubomba bulebule akandu kalikosa? Kangi aba Pentekosto, bingi ba bene, bikulwana nu mwene; akabalilo kako, aligwesa u ndumbilili nkisu kyoutu ābagisenie ukwima ikyala-ku-kyala nu mwene, nukuti, “Kyala, tuma pási a Maka Gako.” Muketile, apo po uswe tulipo, pápo ikyene kikabagila ukubikigwa mbuyo.

²⁰⁴ Efraimu batikulonda ukusyala mma. Yumo mwa bene buka kwa kuno, uswe tukummwaga Manasesi ikwisa kubwa kuno, kuypoba, “O, mwe, u Ntwa āmbele une ungunu ununu gwa filombe!” Polelo apa ikwisa ukukilania apa, Gadi, ikuti, “Ena, lilino, gūlila i miniti. Une mbagisenie ukukusya amapemba, loli nīne ngutwalaga ifilombe nīne. Aleluya!” Umwe muketile? Ugwe ukaya nako nakoma akakubomba ni filombe; twalaga mapemba, mapemba yo kiyabo kyako ukukusya. Ugwe ukābagisānia ukutima i ng’osi akabalilo kako ugwe ubagisenie ukutima i ng’ombe. Kyala ikulonda ukubika i Kipanga. Loli aligwesa yumo gwa bene ikulonda ukubomba i kindu kimokyene. “Aleluya!” Ugwe ukabagile ukubabula abene i kindu ukufwana ni kyene. Umma, umma. Abene bakāli bali na kayilo ka mbene kala, “Butt, butt, butt, butt, butt, butt, butt.” Muketile, ugwe ukabagila ukubabula abene. Ikyo kyo kitalusye. Lilino, ngimba ubo bo bwanaloli? Kangi ugwe ukabagila ukubika pabuyo i kipanga. Muketile?

²⁰⁵ I kipanga kibagisenie ukumanyigwa-ngānila ku bufwikigwe bwa bāna, kūko u nnyambala... Kyala abagile ukummwega u nnyambala nukumfwika umwene mu nyumba, nukumpa umwene i kindukimo. Ikyo, ikyakwanda, gela ikyo kangi keta linga ikyene kitalusye. Ili Bangeli lyāyobile gela i mbepo. U nnyambala uyu ukwiyoabela a kandu kamo, gela akene kangi keta linga akene ko katalusye. Linga akene ko katalusye, endaga kifuki na kene. Polelo yoba, “Ntwa, tutumila uswe i kindu kimo ikingi.” Umilisyaga ukwenda, muketile, itolo umilisyaga ukwenda mpaka umwiniti aligwesa ikwega ubuyo bwake. Polelo ugwe kubukaga ukuketa i kipanga kya Kyala kikwanda ukwega u buyo bwake. Polelo akabalilo kako aba Filisti bikubuka ukutugasya ku nyumba ukutulana. Ibundu sikusōka ngapo, i nywili sikukūlāga pási, ifisyo fisakusukigwaga; ingambo sisakusabukaga. Uko ko kutalusya. Akabalilo kako i Kipanga kikwanda ukubuka mMaka amanywamu Gake, akabalilo kako uswe tulinagwe Ananiya na Safira, kangi na banini ba abene. Ena, nkulumba. Ugwe kukétaga akabalilo kako i Kipanga ikikemo kila kikwima palikimo mMaka Gake, pabuyo-na-pabuyo kibikigwe mbuyo ukuya banabalumiana ba Kyala, bafwikigwe mu nyumba ya Kyala, i Kipanga kyamaka kimile pala mu lwimiko Lwake. O, ikyo kyo iki Umwene ikwisila.

206 Kéta muyilile ubutali kūko uswe tuliko, bakundwe? Ugwe ukabagile nukwisa palikimo pa Lisimbo. Kangi u nnyambala aligwesa, u nnyambala aligwesa uyu akabagila ukupilikisya u losyo lwa mmisi mu li Bangeli, mu Ngamu ya Yeso Kristi, umwe yo pamo mfwamaso pamo i kindukimo muntu kisobilemo. Uko ko kotalusya. Kangi apo pa kulipo ukulwa ukunywamu kuli.

207 Une nguku—une ngumbulaga u mundu aligwesa uyu ikundwālila une i Lisimbo lililyosa pápo aligwesa ālyosigwemo siku mu ngamu yiliyosa iyingi palubafu i Ngamu ya Yeso Kristi, mu kipanga kipya. Pamo, linga umwene ālyosigwe injila iyingi yiliyosa, umwene āfimbilisigwaga ukōsigwa kangi mu Ngamu ya Yeso Kristi, ukuti akabe u Mbepo Mwikemo. Ugwe gwise usannangisye une. Pakayapo nakimo bo ikyo. Kukayako nakumo ukutumigwa bo uko. Akabalilo kako Yeso āyobile kula, “Bukaga umwe polelo, manyisya ifikolo fyosa, ukubōsya abene mu Ngamu ya Tāta, Mwanundumiana, kangi Mbepo Mwikemo,” Tāta, Mwāna, pamo Mbepo Mwikemo, nayimo ya iyene yo ngamu, nayimo ya isyene, Peteri alinkusyumbutuka, palapala amasiku kalongo amakonge, alinkuti, “Pinduka, kangi amosigwege, aligwesa gwa umwe, mu Ngamu ya Yeso Kristi, ku bufyule bwa mbibi.” Kangi paliposa mu li Bangeli . . .

208 Kangi polelo apa bāli bamo bālyosigwe pási pala, injila yimo iyingi, na Yohāni, itolo ku bupinduke. Pauli alinkuyoba, “Umwe mukufimbilisigwa ukōsigwa kabubili kangi. Umwe mukufimbilisigwa ukwisa kangi.”

209 “O, loli uswe tōsigwe nu nnyambala umwikemo, Yohāni. Umwene ālimmosísye Yeso.”

210 “Umma ndaga, iyi yo Nongwanunu. Uyu yo Mbepo gwa Kyala uyu isile ukusetukila kwa une. Une ne ntumigwa gwa Ntwa, kangi linga u gwandumi ukufuma ku Mwanya ikwisa nu kulumbilila kalikosa akangi . . .”

211 Unko une mbale ikyo. Ili Bangeli lyāyobile, “Linga ugwandu- . . .” Pauli āyobile, “Linga u gwandumi ukufuma ku Mwanya āyobaga kalikosa akangi,” bishopu, bishopu-nkulumba, pāpa, ungagili-gwafyosa, kilikyosa umwene abagile ukuya, “linga umwene ikulumbilila kalikosa akangi palubafu Iki kikyo une ndumbilile kwa umwe, ndeke umwene ayege ngunigwe.” Lukayapo nalumo . . . Uswe tukaya nalo u lwiho lwa luko ulu bo ulu. Umma, nkulumba. Ugwe itolo . . . Kikayako itolo ni kindu kimo ikya luko. Ugwe, uswe . . . Kangi polelo—polelo, kéta, nongwa ya fiki a bandu batikukibona ikyo? Ngimba nongwa yafiki iyi a bandu batisa—batisa—batisa kwitika ikyo? [U nkundwe ikuyoba, “Bamanyígwe-ngānila.”—Nsimbi.] Muketile? U munduyumo akitikile ikyene palapala pala, Gene. “Bamanyígwe-ngānila,” katikati. Nongwa ya fiki? “Bosa aba Tāta ambele kwa Une bisa” (Fiki?) “kwisa kwa Une.” Mumo kiyilile katikati! “Bosa aba Tāta ambele Une bisakwisaga—

bisakwisaga kwa Une.” Ngimba kitamisye fiki na une, une ngugela ukupaga apa? Uswe tuli apa. Umma ndaga.

212 Unko une itolo mbale ilinandi ili kangi polelo une ngubabulaga umwe isi Pauli, i findu ifi. . . Yilayila i Ndumi iyi une ndumbilile ikilo iki, apa po iki Pauli ayobile pa kumanyiligwe-nganila, pa losyo lwa mmisi mu Ngamu ya Yeso, u losyo lwa Mbepo Mwikemo, ukwitugasya mu kipanga, na fyosa bo ifyo. Ifi fyo ifi umwene ayobile:

Une nguswiga (ikubabula abaGalatiya aba) ukuti umwe nakalinga itolo mukusamisigwa ukufuma kwa umwene uyu abakolile umwe ku. . . lipyana lya Kristi (Une ngosigwe isoni na umwe, mmasyu agangi, ukuti umwe mumwitikisye u munduyumo ukwisa kuno, ukuba niongotola umwe ukusokako ukufuma ku Ikyo.) ku nongwainunu iyingi:

Iyi yo yikaga iyingi; loli balipo bamo aba bikubatamia umwe, kangi bikupinga inongwainunu ya Kristi, ukupinga Inongwa ya Kristi iyanalolili.

213 Loli ketesya. Lilino, kumbukilaga, ali yo Pauli uyu abafimbilisye u mundu aligwesa uyu akalyosigwe mu Ngamu ya Yeso Kristi, ukwisa nu kosigwa kangi mosa mu Ngamu ya Yeso Kristi. Balinga basimenye ukuti ubo bo bwanaloli? Balinga bamenye ukuti umwene ali Pauli uyu ayobile ukuti ifyakubutitu ifi fyafisigwe ukufuma ku lwalo lwa kisu, kangi fyasetuligwe ku mwene, ukuti uswe twamanyiligwe-nganila ukuya banabalumiana ba Kyala ku bufwikigwe, umwene ali Pauli? Keta kuno iki umwene ayobile:

Loli palema nalinga uswe, pamo u gwandumi ukufuma ku mwanya, ikulumbilila inongwainunu iyingi yiliyosa kwa umwe ukukinda iyi uswe tulumbilile kwa umwe, ndeke umwene ayege ngunigwe.

214 Komma itolo ukuyoba, “Une ndikwitikisania na ugwe, tata.” Itolo ndeke umwene ayege ngunigwe. Unko une mbale ilinandi ilikonge:

Bo mumo uswe tuyobile pabutasi, mo mumo une lilino kangi, Linga u nnyambala aligwesa ikulumbilila inongwainunu kwa umwe ukukinda iyi uswe tutalile twambilile, unko umwene ayege ngunigwe.

215 Uko ko kotalusya. Lilino, nkundwe, kalumbu, linga ali yo Kyala ilisiku limo, kangi une—une nguyoba ikyo, ngusubila komma ukuya nsitaluyindiko, ikyo kyalinyegile une ukukabona akaniki aka. . . Lilino, une nguyanhobofu; une ndikusakikisya une nguyanhobofu, une itolo nguya nsayigwa mu bulumbilili. Une nguya panimwene kangi une ngubakyunga umwe apa mpaka une mmenye umwe mulibatulo kangi mukatele. Loli, o, une. . . Linga umwe—linga umwe mwabagile itolo ukumanya une

ngulondela umwe kumwanya kula! Muketile? Kangi akabalilo kako une, akabalilo kamo nāyobile iki, akabalilo kako une. . . akabalilo kako Umwene āyobile. . . Une ndinkuti, “Ikyene kikubombaga. . .”

Umwene alinkuti, “Ngimba ugwe kulonda ukukéta iki ubumalikisyo buli?”

²¹⁶ Kangi une ndinkukéta ku nyuma kangi ndinkukéta nimwene ndamalele pala pa kitala. Naloliloli umwe mumenye une pabutali ukufwana ukumanya ukuti—ukuti—ukuti une nguyoba u Bwanaloli. Une ngulonda ukubalālúsya umwe i kindukimo, bo Samueli āyobile pabutasi bo bakāli abene ukumpaka Sauli, ngimba une mbabulilémo umwe akandu kalikosa mu Ngamu ya Ntwa kene kako kali kābwanaloli? Ngimba uko kutalusya? Ikyene kiyile bwila kyabwanaloli. Ngimba une siku nisilémo nsumile umwe panongwa ya hela pamo akandu kalikosa bo ako? Umma, muketile, une ngabombamo siku. Ngimba une mbombilémo siku akandu kalikosa loli ngelile ubununu bwangu ubukindebosa ukubalongosya umwe kwa Kristi? Katikati.

²¹⁷ Lilino abene bikulonda ukuyoba une ne mmanya-pabutali gwa muntu, umwe mumenye, ugwakwenesya-ugwakwipilika. Ena, i findu fila fikufimbilisigwa ukufyuka, ili Bangelo lyāyobile abene bikubombaga. Bo yu Yambure na Yanesi bimikanaga na Mōse, abene bābombile kifuki fiyo i kindu kilakila Mōse ābombile, mpaka ikyene kīsága pásiku bubonekesyo. Uko ko kutalusya. Loli kumbukilaga, Yambure na Yanesi bakābagile ukubumbulusya. Abene bakābagile ukubumbulusya. Abene bābagile ukutwala ifigwaya, loli komma ukufisosyamo ifyene. Muketile? Umma ndaga. Lilino, Kyala yo Mbumbulusyi. I Lisyu lya Kyala lisyéle Bwanaloli.

²¹⁸ Une ngelile ukuya gwabwanaloli-ndumbula na umwe. Une ngelile ukubabula umwe u Bwanaloli. Une mbombile—une mbombile. . . ku fyinja malongo-matutu-na-kimo, une nimile pa kigemo iki, nsōkilépo kangi ndipo, ku fyinja malongo-matutu-na-kimo, kangi i lisiku limo mbagile ukusókápo ukubuka ku Lwimiko palubafu lwa kigemo iki. Alipo u nkasi, umwanundindwana, u tāta, u nkundwe, bosa basyiligwe ukukilania pala, abinangu abapala. Une ngétesisye amabokosi gabo na maluba gabo gitugesye pala, kangi mumo i lisiku limo ukuti ilyangu lisakuyaga, nīne. Lilino, ikyo kyo kyabwanaloli. Loli nubwanaloli, ukufuma ku ndumbula yangu yosa, une ngubabula umwe ni ndumbula yangu yosa, une ngusubila une ndumbilile kwa umwe i Nongwainunu iyabwanaloli iya Ntwa Yeso Kristi. Une ngwitika ukuti umwe mukufimbilisigwa ukōsigwa, aligwesa gwa umwe, mu Ngamu ya Yeso Kristi, kangi ambulilaga ulosyo lwa Mbepo Mwikemo. Kangi akabalilo kosa aka umwe mukubomba, ikyene kikutwalaga kwa umwe

ubwikyele, ulutengano, ukukubilwa-katali, ubununu, ubololo, ubwiyufye, ubufindang’oma, ulwitiko.

²¹⁹ Kangi i lisiku ilingi, iki kyabonike kwa une ulubunju lula, une ngamanya. Une ngabagile ukuyoba mpaka na mwisyugu ukuti kali nāli apa mu mbili gwangu kangi itolo nāketīle imboniboni, pamo kali une nānyakiligwe ukufuma kuno, ukubuka kula. Une ngamanya, une ngabagila ukuyoba. Ikindu kyene iki une mmenye, ukuti une—une bwila nātilaga u kufwa, akafwasi kanini kala aka butito. Loli komma ukutila ukuti Yeso atikwisa ukunyega une, lilino, une ngātilāga ikyo, kabuno une—une ngātilāga ikyo; loli linga une ngwaganaga na umwe kangi itolo ukuya kafunienie akanini akaiyolo kikwelela mmwanya mu mbepo. Loli une ngetile lilino. Akabalilo kako une ngetile a bandu bala, abene bāi banaloliloli. Kangi abene bāli bandu aba akabalilo kamo bāli bililanisi na une apa pa kisu, kōpe ku nkasi gwangu ugwakwanda. Umwene akāli nkasi gwangu, umwene āli kalumbu gwangu. Umwene akālingolilēmo une ndume gwake, umwene angōlelāga une u nkundwe gwake unganigwa. Kukaliko ukugonana, kisita kwipilika ukwa luko ulo, ikyene kikābagīle mma; ikyene kyāli kipelelesye, ikyene kyāli bunoge, ikyene kyāli bupelelesye.

Une nguswiga, une ngamanya, une nguswiga: Ngimba iki kyo umwene āketīle, bo umwene akāli akakileka ikisu? akabalilo kako umwene āli kwisilya nkipatala, akabalilo kako une nālinkolīle umwene, kangi umwene ātile, “Billy, ugwe ulumbilīle isyakufwana ni kkyene, ugwe uyobilēpo isya ikyene, loli,” umwene ātile, “ugwe ukamanya ukuti ikyene kyo fiki.” Umwene alinkuti, “Une gaya ni kinyonywo ukusyala.”

²²⁰ Une nguswiga linga ikyo kyo iki ikyene kili, na yula ugwakyala, ugwabwikemo ungangale nnyambala gwa F. F. Bosworth, uyu ālimilēmo mu kigemo iki, uyu ālumbilīle na une ukusyungutila ifiyabo ifikindane fya kisu kya pāsi. Ungangale F. F. Bosworth, mwesa ba umwe, kifuki, mwālimēnye umwene; gwakyala, gwabwikemo nnyambala ungangale. Isala ibili bo akāli, ena, ukufuwana undungu gumo pamo mibili bo akāli akasōkāpo, une nābukile ku mwene kangi pala umwene ālambalele pala, kubutali, kifuki ifyinja mia ukusosyako kalongo mbukusi. Utuboko twake utunini tulinkufikila, untu gwake unnini ugwapipala kangi indefu inyelu sila pa kisyo kyake. Une ndinkunkola u nnyambala ungangale yula kangi une ndinkuywega, “Tāta gwangu, tāta gwangu, amagileta ga Israeli kangī abanyambala ba falasi aba pala.”

Kabuno linga ālimo siku u nnyambala uyu siku imililaga Pentekosti kangī āli ntumigwa gwabwanaloli, umwene āli F. F. Bosworth, mwifyusi, gwakutalula, Nongwaininu yanaloliloli, muketile, umwene āli Bosworth. Kangi akabalilo kako une nālinkolīle umwene mmaboko gangu, kangī une nāywegile,

“Tāta gwangu, tāta gwangu, amagileta ga Israeli kangu abanyambala ba falasi palapala.”

221 Umwene alinkuti, “Mwanundumiana, umilisyaga ukusyala pa ngunda.” Alinkuti, “Bakomelangamo bamo mwa abinitu abakeke aba ku migunda gya panja, linga ugwe ubagile, bo abene bakāli ukwega ubumilisi ubwingi panja pala. Begela abene i Nongwainunu iyabwanaloli iyi ugwe uli nayo, mwanundumiana.” Umwene alinkuti, “Ubutumigwe bwako bukandaga tasi ukuya iki ubwene bwisakuyaga.” Alinkuti, “Ugwe gwe Branham umpya naloli.” Alinkuti, “Ugwe uli nkeke, mwanundumiana.”

Une ndinkuti, “Nkundwe Bosworth, une ndi ni fyinja malongo-mana-na-lwele mbukusi.”

222 Umwene alinkuti, “Ugwe ukandako tasi.” Umwene alinkuti, “Komma ukubitikisya abalumbilili abakeke aba kiPentekosti aba babukege ukukilania kula nu butoyofu bwingi, nukubikamo ikitanda i kindu mosa, kangu ega bosa aba—aba abimili-bakisu ni kisu kyosa ukulwana ni Yene bo ukāli ukufika kula.” Alinkuti, “Kindililaga, Nkundwe Branham, kindililaga ni Nongwainunu iyi ugwe ulinayo.” Umwene alinkuti, “Une—une ngwitika ukuti ugwe gwe u ntumigwa, pamo unsololi gwa Ntwa Kyala gwitw.”

223 Une ndinkunkéta umwene, une ndinkufugatila umwene mmaboko gangu. Une ndinkuti, “Nkundwe Bosworth, une ngulonda ukukulalusya ugwe ililalusyo. Ngimba kāli kabalilo kaki akabuhobofu ukukinda-kosa akāko... akabalilo ka ugwe... ifyinja fyosa ifyako ifi ugwe ulumbilile?”

Umwene alinkuti, “Lululu lilino, Nkundwe Branham.”

Une ndinkuti, “Ngimba ugwe umenye ukuti ugwe kufwa?”

Umwene alinkuti, “Une ngabagila ukufwa.”

Une ndinkuti, “Fiki... Nongwa ya fiki ugwe ubagile ukuyoba aka ko kabalilo kāko ka bohofu fiyo?”

224 Kalipo akalyango akanini. Umwene alinkuti, “Une ndambalele apa ni kisyo kyangu kisanukile ku bwa ndyango gula. Kifuki i miniti yiliyosa, Yuyo uyu une nunganile, kangu Yuyo uyu une ndumbililépo kangu numwimilépo, fyosa ifi... ubumi bwangu, Umwene ikwisaga pa kifigo kila panongwa ya une, kangu une ngubukaga na Umwene.” Une ndinkunketesya, une ndinkwinogona, une—une nāketaga kilakila bo une nanketaga Abrahām, Isāki, pamo Yakōbo.

225 Une ndinkwega ikiboko kyake, une ndinkuti, “Nkundwe Bosworth, uswe twesa-babili tukwitika u Kyala yulatula, uswe tukwitika i kindu kilakila. Ni lipyana lya Kyala une ngwisakulumbililaga mpaka ubutuyo bwabumalikisyo bukusokamo mu mbili gwangu. Une nisakūmilisyaga ukuya gwabwanaloli kwa Kyala mumo une mmanyile ukūmilisya. Une ndisakubonela pa Nongwainunu pa lubafu lulilosa pamo u buyo

bulibosa. Une ngūmilisyaága ukuya gwabwanaloli mumo une mmanyile ukūmilisya. Nkundwe Bosworth, une nisakwaganaga na ugwe mu Kisu ikinunupo kūko ugwe utisakuya nkeke. . . pamo komma ukuya nkangale kangi mma, loli nkeke.”

226 Umwene alinkuti, “Ugwe kuyaga pala, Nkundwe Branham, komma ugwe ukupasya.”

227 Kangi isala bo akāli, isala ibili bo akāli umwene ukufwa. . . ukufwana i myeso mibili ukufuma apa, une ninogonaga ukuti umwene afwaga akabalilo kala, unkasi gwangu alinkwisa mulingi nukumbona umwene (umwene akabalilo kosa inogonaga fangi fiyo ifya umwene), kangi polelo Nka. Bosworth. Kangi ukufwana i sala ibili umwene ālambalele pala, agonile utulo. Umwene alinkufyuka mmwanya, umwene alinkukéta, kangi umwene alinkunyela mmwanya ukufuma nkitala kyake. Umwene alinkuti, “Māma, ena, une ngakubona ugwe ku fyinja! Bāba!, Nkundwe Jim, nongwa ya fiki,” alinkuti, “unko uswe tukéte, ugwe gwāli yumo mwa bapinduke bangu kwa Ntwa, ku Joliet, Illinois.” Umwene āfwile ku fyinja malongo mahano. Muketile? Ena! Umwene alinkuti, “Ugwe gwe Kalumbu *Gwakuti-na-gwakuti*. Ena, une nākulongolīle ugwe kwa Ntwa ku—ku lukomano lwa ku Winnipeg. Ena. Fiki, apa pali Kalumbu *Gwakuti-na-gwakuti*. Une ngubwene ugwe. . . Ena, muketile, ugwe gwisile kwa Ntwa ku *kwakuti-na-kwakuti*.” Kangi ku sala sibili kisitakulekesya umwene alinkuponania amaboko na bala aba umwene ālongolile kwa Ntwa. Alinkwenda ukugomokela kulakula ku buyo bwake, kangi alinkulambalala pási, ukupingania amaboko gake, kangi kila kyo ikyene. Ngimba u Nkundwe F. F. Bosworth ālingile i Kisu kila kikyo Yeso ālinyitikisye une ukukéta ikilo ikingi? Linga ikyene kyo kili, umwene yo nnyambala nkeke ikilo iki. Kyala atusye i moyo gwake. Kangi une ndiyaga nu bumi siku ukuya nsubiligwa fiyo ukuti une ngwisakwingila ku Kisu kila. Kangi ndiyaga une gwabwanaloli fiyo u—u gwambombo gwa Kristi!

228 Une ndinisoni panongwa ya bumi bwangu. Une ndinisoni panky-. . . une—une. . . Linga une ndulil’inongwa pankyeni pa umwe bandu, umwe—umwe muli ni ngongole kwa une ukwisa ukumbula une. Muketile? Une ngugela ukuya nu bumi ubugologu mu kilikyosa iki Kyala ikunyitikisya une mbombe mu lipyana Lyake. Muketile? Loli, keta, binangu, umwe muli nukumelelígwa ikyene kwa une linga umwe mumenye kalikosa aka kasobi nu bumi bwangu, isaga musambúle une mumo. Kangi, kéta, une ndinukumelelígwa ikyene kwa umwe ukwima apa nukulumbilila umwe i Nongwainunu iyabwanaloliloli. Une ndinakyo ukumelelígwa ikyene kwa umwe, panongwa yakuti une ngugūlīla ukubabona kilikyosa kya fisyo fyinu, abanyamba na bakikulu abakeke, itolo ukukilania ulupaso lula kwisilya kula. Ikyene kyo butuyo bumobwene

itolo pakati pa apa umwe mulipo lilino na kula. Lilino, uko ko kotalusya. Ikyene kiliko kula.

229 Kangi ngusuma u Kyala gwa ipyana lyosa, u Kyala gwa ku Mwanya, komma ukuya gwamahelu, loli nu luyindikiko, “Papa,” pisiku ilikulumba lila akabalilo kako uswe twisakutwaligwaga ku nyuma kula nukuya ni mibili gya nkisu kangi, ukuti uswe tubagile ukunwa, nukulya imipesa ni fipaso fya kisu. “Abene bisakuyenga i nyumba kangi uyungi atisakwitugasyamo mma. Abene bisakubyalaga imigunda gya mipesa kangi uyungi atisakulyaga ukufuma mula mma.” Muketile? U nnyambala yumo ikubyalala ungunda gwa mpesa, u mwanundumiana gwake ikwega ugwene, kangi polelo u mwanundumiana gwake ikwega ugwene, kangi u mwanake. Loli komma mu nongwa iyi; umwene isakubyalala ugwene nukwitugasya pala. Muketile, uko ko kotalusya. Uswe twisakuyako kula bwilanabwila. Kangi ngusuma, mu Kisu kila, une ngusuma une mbakéte aligwesa gwa umwe.

230 Kangi une mmenye ukuti une nguyoba muno apa kópe ku balumbilili ba butatu. Kangi, bakundwe bangu, une ndikuyoba iki—une ndikuyoba iki ukufulasya mma. Une nine ne Gwabutatu, nīne, Une ngwitika mu butatu, imbagililo itatu isya Kyala (Tāta, Mwana, nu Mbepo Mwikemo), loli komma aba Kyala batatu. Muketile? Une ngwitika silipo imbagililo sitatu, kifwasyale, Une ngubomba iki ni ndumbula yangu yosa, “Tāta, Mwanundumiana, nu Mbepo Mwikemo,” loli abene bakaya baKyala batatu mma. Ifyene fyo itolo fitatu ifyakumbagi- . . . pamo ifya mu mabofesi matatu aga Kyala. Kyala āli nu bumi akabalilo kamo mwa Bwatāta, Bwānubulumiana, kangi lilino u Mbepo Mwikemo. Ikyene yo Kyala yulayula mu mabofesi matatu. Kangi abene ba . . .


231 Kangi Tāta, Mwanundumiana, kangi Mbepo Mwikemo, yikaya Ngamu ya Kyala mma. Kyala ali ni Ngamu yimoyene, kangi i Ngamu Yake yo Yeso. Ili Bangeli lyāyobile, “Ikikolo ku Mwanya kikukòleligwa Yeso, kangi ikikolo nkisu kikukoleligwa Yeso.” Uko ko kotalusya. Momumo Kyala āli ni Ngamu yimoyene, i Ngama ya būndu. Umwene āli . . . āli ni ngamu yakòleligwaga Yehova-yire, Yehova-rapha, aga gāli mapalo Gake ga Bwakyala. Loli Umwene āli ni Ngamu: Yeso! Kangi uyu yo Umwene.

232 Kangi nubwanaloli, bakundwe bangu, linga umwe mukukanikana na une, kumbukilaga, une—une—une ngwisakwaganaga na umwe ukukilania kula, mulimosa. Muketile? Une—une nguyaga kula na nūmwē. Kangi Kyala abasaye umwe. Kangi une mbaganile umwe.

233 Kangi une ngulonda i kipanaga ukukumbukila lilino, Ndungu kulubunju uswe twisakupimbaga ukufuma apa kangi une ngwisakugelaga ukusita kubakyunga umwe kisita

kukindilila isala ya kibili pa koloko, ukuti uswe tubagile ukuya nu lukomano lwa pamusi, linga uswe tubagisenie ukubagila, kangi linga une ngubomba kanunupo bo mumo une mbombile ikilo iki, kalongo-malongo-matatu. Ngimba umwe mukunswa une? Binangu, uswe tukaya nako akabalilo kingi aka kasyele, lūki. Une—une ngubakōlela umwe “lūki” panogwa yakuti umwe muli. Umwe—umwe muli bālūki bangu. Umwe mumenye ikyo? Unko . . . Apa po i Lisimbo likwisa. Pauli alinkuti, “Une ndinakabini pa umwe (Ikipanga Kyake) na kabini ka bunyakyala, kabuno une nabasongile umwe.” Muketile lelo, mwe mukipilikisye ikyene. Ikyo kyo ikyene. “Kabuno une mbasongile umwe, ukubakolekesya umwe kwa Kristi, ukuya mfunde unsingiligwa.”

²³⁴ Lilino, linga ikyo kyāli kyanaloli akabalilo kala pisiku lila, umwene āyobile . . . Abene, a bandu bāyobile kwa une, balinkuti, “Yeso isakwisa kwa ugwe, kangi ugwe kwisa kututwala uswe ku Mwene,” u mfunde unsingiligwa. “Balōngigwe ni Lisyu ili ugwe gwālumbilīle ku bene.” Kangi, kēta, linga une ngulumbilila kwa umwe itolo iki Pauli ālumbilile ki kipanga kyake, linga ikubugutila kyake kikwingila mula, ikyitu kisakwingilaga kyópe, panongwa yakuti uswe tulinakuo i kindu kimokyene. Amen.

Unko uswe twinamisye imitu gyitu lilino akabalilo kako uswe tukuyoba, “Kyala akusaye ugwe.” Lilino . . . ? . . . untimi gwitu unganigwa, Nkundwe Neville. 

BUFWÍKÍGWE ² KYA60-0518
(Adoption ²)

IMBĀTIKĀNO SYA BUFWÍKÍGWE

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Kitatu namayolo, Meyi 18, 1960, ku Branham Tabernacle mu Jeffersonville, Indiana, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org